



De republica Germaniae, seu imperio constituendo

<https://hdl.handle.net/1874/9512>

2

DE REPVBLI- CA GERMANIÆ, SEV IMPERIO CONSTI- TVENDO.

IVLIVS PFLVG EPISCOPVS

Numburgensis ad Germanos.



ANTVERPIÆ,

Ex officina Gulielmi Siluij, Regij Typographi.

ANNO 1563.

PRIVILEGI TENOR.

LITTERIS Regijs cautū est ne quis librum hunc, cui
titulus est De Repub. Germania & seu Imperio constitue-
do auctore Iulio, Episcopo Numburgensi, praeter Guliel. Sil-
uium sue Maiest. Typographum intra annos sex proximos, in
omnibus hisce sue Maiest. ditionibus vlo modo excudere, aut
alibi excusum distrahere audeat, qui secus fecerit, plectetur ex
tenore Priuilegij dati Bruxelle 23. Junij, 1562.

БИБЛІОТКА
Державного
Університету
Ім. Івана Франка

AD GERMANOS.



Vm animaduertam, Principes populique Germani, Rempublicam nationis nostræ hoc tempore suo grauiter laborare, incredibile est, quanta animi solicitudine afficiar.

Quando enim maiores nostri hanc nobis satis beatam reliquerunt, si ea forte consideret, statuere non facilè possem, vtrum id miseriū futurum esset nobis, an verò turpius; cum præsertim nullum illius malū a nobis seiunctum esse possit, & talis se offerat occasio hoc tēpore, vt Respublica eadē nostra non solūm conseruari, sed etiam ornari facilè possit. Quo minus committendum puto, vt hanc non complectamur animis omnes, nec in eam quantum pro sua quisq; nostrum virili parte potest, cōferamus. Quod vero ad me attinet, et si tenue est, quod possum ego, tamen ne desim meo erga Germaniam nostram qualicunque officio, quæ mihi de huius commodis ornamentisque omnibus cogitanti in mentem veniunt, explicare conabor; vt si forte euentus bonus voluntati meæ atque consilio respōderit, res nostræ secundē non minus me delectent, quam aduersæ hoc tēpore cruciant: sin minus, hæc tamen vox meę perpetuæ erga patriā voluntatis testis esse possit. Ac quia operā dare debemus omnes, qui caritate patriæ mouemur, vt status eius sit lōge optimus: præclare agitur nobiscum, quod maiores nostri Rempub. nostram tam bene constituerunt, vt

A 2 nunc

nunc non de noua huius forma inducenda, sed de veteri vel retinenda, vel recuperanda consilium nos ini re oporteat. Itaque primo ostendam, vt illa e calamitoso quodam statu suo in eum, qui plane beatus esset, fuerit translata, cum Imperium eius initio constitueretur; deinde labes, quas postea ita contraxit, vt a beato illo statu in calamitosum recideret, monstrabo. Postremò qua via & ratione non solùm restitui ea in locum, vnde decidit, bonum, sed etiam excoli atq; amplificari possit, docebo. Attendite igitur Principes populi que Germani, & id tribuite mihi, vt si non iniuria dixero, ea ne repudietis. Atque vt, quæ de statu Reipub. nostræ primo loco dicenda sunt, afferam, constat Rempublicam omnem sic institui, vt vel unus summæ eius præsit; vel optimates aliquot pari cum potestate; vel penes populum sit eiusdem regendæ potestas. Etsi autem postrema hæc forma in ciuitates & populos nō ita magnos utiliter cadere potest, magnis tamen gentibus atque nationibus non est satis accommodata. In quibus nisi existant Magistratus, qui multititudini nobilitate atque opibus antecel lant, hæc ægre in officio contineri potest. Quare cum initio homines cœtus inter se celebrare cœpissent, in uenta est Regum potestas, eaque talis, vt singulis singulis populis cum imperio præcessent, ius dice rent, tuerentur bonos, & sceleratos coercent. Quod ad eas, quæ constitutæ fuerant, hominum societas tuendas cum primis aptum esse videba tur.

tur. Et quanquam forma hæc Reipublicæ quod ad similitudinem procurationis eius, qua Deus vnuſ vniuersum hoc quod cernimus moderatur, proxime accederet, fuit omnium optima: inductus est tamen postea Optimatū status; cum nec vnuſ, nec multi, sed pauci, iijqūe dignitate & potestate inter ſe pares, ſingulas Respub. gererent. Atque hoc genus etſi per ſe bonum, & ciuitatibus liberis vtile ſemper fuit, tamen nec ipsum gentibus maioribus æque ac Regia potestas conducere potuit. Nam vnuſ in Republica Prin ceps, qui potestate ſua aliorum omnium potestatem complectitur, nec vllum habet summi honoris ſocium, concordem, quietū atque beatum Reipub. ſtatū facilius, quām Optimatum procuratio retinere potest. Quippe cum vſu veniat, vt inter eos, qui pari ſunt cum potestate, facile nascātur ſimultates, & ſimultatibus factiones, & factionibus autem motus graues atque rebus publicis pernicioſi. Cuius quidem rei documentum ſtaterunt Græci eo tempore, cum & ſapientiæ, & eloquentiæ, & rei militaris gloria florerent maxime. Nam cum ciuitates horum ſingulæ ſuos haberent Magistratus, qui pari cum potestate forent: & tamen quidam eorundem, vt fit, ſummam rerum appeterent, & alijs Græcis imperare cuperent: extiterunt ſæpe in natione eorum bella intestina, & ipſi patriam ſuam ijs armis, quibus defendere debebant, miserandum in modū dilacerauerunt; cum modò Athenienses & Megarenses, modò Athenienses &

DE REPUBLICA

Lacedæmonij, modò Lacedæmonij atq; Thebani inter se bella infestis animis gereré, & scipios ita conficeré, vt fracti tandem atq; debilitati in Macedonum potestatem concederent, & dura seruitute opprimerentur. Quo tempore visum fuit Græcis ad Rempub. nationis suæ bene administrandam hoc vnum deesse, quod eadem non vnius imperio vniuersa contineretur. Et quanquam Romanorum Respublica, cum post Reges exactos ab Optimatibus regeretur, & creuit mirabiliter & effloruit: id tamen, cū illi intra mœnia vnius vrbis concluderetur, nec horū quisq; tam diu magistratum suū gereret vt Rempub. premere grauius posset, fuit aliquanto facilius, quām si locorū interuallo disiuncti alij alijs ciuitatibus, aut populis præcessent. Sit igitur positum hoc atque fixū, quod ratio summa atq; ipse rerum euentus declarat, gentibus magnis atq; nationibus eam Reipub. formam, quæ vnum habet Principem, longe aptissimam esse atque vtilissimam. Nunc verò, vt hæc ad rem, de qua hoc loco agimus, cōferantur, sic habetote, Rempub. nationis nostræ primò multis Principes atq; Reges, qui pari essent cum potestate habuisse: sed postea quām Imperium eius cōstitutum fuit, vni Imperatori procurationem huius summā creditam fuisse atq; commissam. Et quanquam ex ijs, quæ iam diximus, perspicuum est vter Reipub. status prior ne ille, an posterior per se melior fuerit, & publicis huius rationibus vtilior, tamen non puto alienū esse ab instituto nostro, si de eo ipso paulo accuratius, explica-

tiūsque

tiúsque egero. Constat e veteri annaliú memoria ma-
 iores nostros fidei, constatiæ & fortitudinis gloria sem
 per floruisse: verùm tamen cum nec dum in vnū quasi
 corpus coaluissent, non modò non Imperium consti-
 tuere potuisse sibi, sed nec sua, vt oportebat, tutatos
 fuisse atq; conseruasse. Nam cum qui præcessent Reges
 singulis populis pari cum potestate imperaré, nec le-
 gibus, nec iure æquabili inter se iungerentur, in com-
 mune consuluerunt minime: sed potius horū quisq;
 ad priuata commoda sua omnia retulit. Quin ijdem
 ob cauñas nescio quas & iniurias, quas Reipublice do-
 nare potius, quàm cum huius damno persequi debe-
 bant, bellis inter se grauibus sæpe conflictati fuerunt.
 Hinc peruersus ille mos, vt & patriam suam vexarent,
 & agros quisq; vicinorum, si posset, popularetur, nec
 sociorum armis, in quibus nullum præsidium sibi po-
 situm esset, sed vasta potius solitudine sua munire vel-
 let; eaque non satis tuta esse arbitraretur, nisi a regno
 suo viciorū possessiones quàm longissime dimouis-
 set. Quanquā autem nationis nostræ Respub. in hunc
 statum malum atque prauum inciderat, tamen forti-
 tudo maiorum nostrorum atque rei militaris gloria
 exteras gentes terruit, ne eos armis facile laceſſerent.
 Et Romani ipſi non antè, quàm Asiacæ, Africæ, atq; toti-
 fere Europæ imperarent, eis bellum intulerunt. Sed
 tamen cum cernerent, maiores nostros in factiones
 distractos esse, arte magis atq; callida consiliorum ra-
 tione, quàm vi & armis ipsos debilitare atque oppri-
 mere

DE REPUBLICA

mere studuerūt. Vt enim Philippus Macedonum Rex
simultates atque inimicitias ciuitatum Græciæ olim
aluit, easq; ita commisit inter se, vt suis ipsæ armis
frangerentur: ita Romani materiam seditionibus, atq;
intestinis bellis maiorum nostrorum subiecerunt, vt
gens bellicosa suis ipsa viribus conficeretur. Non du-
bitarat Germanicus eo tempore, quo Tyberius Ro-
mæ imperabat, Cattis atque Cheruscis strenuis atq;
fortibus Germaniæ populis bellum inferre. Et quan-
quam cum his prælia quædam fecerat secunda, tamen
cum Ariminius, qui cōtra illum arma tulerat, inuicto
animo bellum ita semper redintegraret, vt lacesitus
esse potius quam victus videretur, & clades illa fune-
sta, quam Quintilius Varus ab eodem Ariminio acce-
perat, in memoria atq; sensibus Romanorū adhuc he-
reret: eam consilij rationē iniuit Tyberius, vt Germa-
nicus ab armis discederet, & relinquenter locū maiori-
bus nostris cōflictandi inter se, vt tandem debilitati mal-
lent in Romanorū, quorū ope indigerent, potestatem
concedere vltro, quam vicinorū iniurias ferre. Neque
vero Imperatorem hēc spes sua fefellit. Nam inuentus
est non ita multo post Maroboduus Sueorum rex,
qui vt Romanis rem gratam faceret, Ariminio, qui
Cheruscos atque Longobardos ducebat, bellum in-
ferret. Quo confecto Drusus Catualdam germanū po-
tētem sane hominem excitauit, vt in Maroboduū ob
iniuriā, quam ab eo se accepisse arbitrabatur, impetu
faceret. Ac cum hic ab hoste illo suo victus & regno
pulsus

pulsus foret, fecit Tyberius ut Rauennam migraret; & homo magnus ac nobilis a Suevis suis diuulsus in hoc perpetuo quasi exilio reliquum ætatis suæ cōsumeret. Verum cum postea Marobodui factio Catualdam ditione, quam habuerat, vicissim exuisset, fuit hic quidē a Romanis in Galliam Narbonensem missus, & quodam modo relegatus. Atq; ita Principes ambo erepti fuerunt Germanię, ut quanto plus præsidij in vtriusq; consilio atque potentia nationi huic nostræ positum esse videbatur, tanto magis vires eiusdem extenuantur. Secuta sunt deinceps ea, que Tyberius præuiderat: vt cum maiores nostri intestinis motibus multū sanguinis ciuilis hausissent, seq; attriuisserent ipsos, magna ad imperium Romanū accession fieret; & populi quidam Germanię non inuiti in Romanorū potestatem veniret, ut horū præsidio cōtra vicinos infestos munirentur. Et quanquam postea eoru dem virtute magna saepe ac periculosa bella feliciter confecta fuerunt: tamen ea fuit ipsorū cōdicio, vt, cū maximas res sub alienis auspicijs gererent, sibi tamen atq; patriæ cōmuni nullum honoris atq; dignitatis splendorem acquirerent; acquirerent dico? immo quanto magis opes alienas, easq; libertati suā infestas, firmarent, tanto plus detrimenti patria nostra caperet, eiūsq; libertas magis labefactaretur. Cum præsertim arma, quibus gloriose vti possent pro arbitratu eorum in quorum potestate erant, non solū contra exterias gētes, sed etiam contra Germanos qui libertatem suā defendebant, ferrēt,

B

atque

atque adeo patriam ipsam oppugnarent. Sed quorū hæc? Vt intelligi possit, qualis fuerit Germaniæ nostræ status eo tempore, cum non vnius, sed paucorum imperio regeretur. Cuius calamitas documentum dedit, quām illa Optimatū potestas, aut paucorum dominatio per se non vtilis fuerit nationi nostræ, vel ad libertatem retinendam, vel ad opes augendas, vel ad gloriam, & verum decus pariendum. Quippe cū gens præpotens, & ad imperium Orbis terræ nata ipsa sibi plus damni, quām cōmodi attulerit, quoad ei nec virtus, nec rei militaris ars, sed ea imperij forma, qua omnes illius vires contraherentur in vnum atque iungentur, & illa beata animorū cōsensio deesset. Ac Germania quidem nostra, cum semel oppressa esset, non ante respirare potuit, quām imperium Romanum sua magnitudine, ac quasi mole laborans ruere inciperet. Quo tempore maiores nostri non solūm in pristinam libertatē sē vindicarunt, sed irruperunt etiam in exteras Romanorū Prouincias, easq; vi & armis in suā potestatem redegerunt. Et quanquam tū virtus eorū magis, quām ante, eluxit, tamē eam vim nō habuit, vt patriæ solidos, quos debebat, fructus ferret. Neq; enim id quæsierunt milites nostri, eorūq; Duces vt quas ce- pissent ciuitates, & populos gentesq; ue vicissent, adiijcerent Imperio patriæ, quod nec dū cōstitutū erat, sed vt illam intestinis factionibus dissipatam fugerent, & in exteras Prouincias Romanorū tanquā in colonias migrarent; nec amplius de patriæ, sed earū potius regionum,

gionum, in quibus consedissent, commodis ornamen-
tisque cogitarent. Hinc regna illa Europae, quae maio-
res nostri constituerunt; Galliæ Franci, Hispaniæ Gothi,
Britanniaæ Saxones, & Galliæ Cisalpinæ Longobardi.
Prætereo hic prudēs Sueuos, Vandalos, & Burgundio-
nes, qui simul ac pedes suos e finibus patriæ nostraræ ex-
tulerant, maximas res gesserunt. Sed hos omnes pere-
grinæ sedes, in quas migrarant, ita delectarunt, vt eas
ipsas patriæ, in qua geniti erant, anteponerent. Cum ta-
les essent maiorum nostrorum sensus atque volūtates,
et si quascunque; Orbis terre regiones peragrarent, in eis
vestigia excellentis cuiusdam virtutis impressa relin-
querent: id tamen parū vtilitatis Germaniaæ nostræ at-
tulit, nec ea ante, quam in vnū plane coiret & in vnius
potestate esset, efflorescere, & veram dignitatem cōse-
qui potuit. Quo melius de hac patria nostra meritus
fuit Carolus ille Magnus, cū Saxonū populos potētes
& plane bellicosos diuturno bello domuit; non vt de-
lerentur, sed vt cū alijs potius Germaniæ populis con-
iūgerentur. Quod postea quam feliciter sane euenit, sta-
tuere nequeo, vtrū id victis, an victori maiore vtilitatē
attulerit. Nā hoc pulcerimū post homines natos factū
nō minus salutare fuit Saxonibus atque Germaniæ cun-
ctę, quam Carolo Imperatori glriosum; cū præsertim
Princeps hic optimus Saxones alijs Germaniæ nostræ
populis ita adiunxisset, vt nō solum de Republica, sed
etiam de religione Dei immortalis idem, quod hi, sen-
tirent. Quo tempore cum ita natio nostra in vnum

DE REPUBLICA

coaluiisset, vt & vnius imperio pareret vniuersa, & vnū Deum atque Dominum Iesum Christum veneraretur: tanto magis omni bonorum genere aucta fuit, quanto minus sub dominatione paucorum, eaque factiosā crescere potuerat. Nam eo tempore a moribus horridioribus ad eam mansuetudinem traducti fuerunt maiores nostri, vt legibus & iure æquabili viuerent libenter: nec patriam, vt antè, intestinis bellis dilacerarent, eiqūe vastitatem inferrent, sed iuuarent potius quibuscunque rebus possent, atque tuerentur: nec solitudine delectarentur amplius, sed cōtibus hominum iure sociatorum, nihilqūe eorum, quæ ad Rempub. ornandā pertinere videbantur, prætermittent. Itaque vbi antè fuerant saltus ferarū congregati sunt maiores nostri, & cōetus inter se celebrare cōperunt; vbi delubra Idolorum atq; Demonū fuerant, templa, sedes atq; collegia Sacerdotū, qui nomen Dei vera cum pietate inuocarent, & pro vniuersa Ecclesia supplicarent, Sacris operarētur, & gregem Domini salubriter pascerent, construxerunt. Vbi denique solitūdines vastæ fuerant, cōenobia religiosorum atque Sanctorum hominum, qui quanto longius se a spinis huius mundi dimouissent, tanto diligentius Scripturas sacras euoluerent, & in res diuinās incumberent, constituerunt. Breuiter talis eo tēpore Germaniæ nostræ status collocatus fuit, vt in ea vigeret concordia, vigeret iustitia, vigeret pietas & religio vera; & qui summæ rerum præcesset vñus, tanta cum potestate esset,

esset, vt statum illum Reipub. beatum conseruare, & seditiosos atque hostes patriæ coercere facile posset. Quare cum Respub. patriæ nostræ tam bene constituta esset, & vinculis illis optimis contineretur, non potuit non mirabiles sui amores excitare; nec inuenti sunt amplius populi Germaniæ nostræ, qui vt antè desererent hanc, & peregrinas sedes quæreret; nec vtri alteros opprimerent, sed vtri de patria communis melius mererentur, inter se magna cum gloria certauerunt. Et cum maiores nostri virtutes tantas cum fortitudine, cuius gloria semper floruerant, coniunxissent, patriam non solum singulari animorum consensione defenderunt, sed etiam, quibuscunque rebus possent, ornauerunt, & ipsis in oculis omnium gentium viure cœperunt.

Iam verò etsi Carolus ille Magnus Imperiū, quod virtus Romanorum in Occidente constituerat, recuperauit, idquē non sine magno & Francorum & maiorum nostrorum honore, & ei vt Germano ob præclarā in Rempub. merita diadema Imperatoriū sollemni ritu impositum fuit; tamen cum liberi eius atque posteri Imperium hoc tāquam hereditatem paternā adirent, Gallia, quam ijdem incolebant, ita sibi idem Imperium vindicauit, vt possessione eius maiores nostros excludere conaretur. Sed cum post Arnulphum, qui magnum dedecus in gētem Carolinam intulerat, Imperium iterum labaseret, ab eōq; deficerent Provinciæ magnę, cum nec magnum in familia illa præsi-

DE REPUBLICA

dium sibi positum esse amplius sentirent; & Hunorū, qui erant infestissimi nominis Christiani hostes, opes indies magis ac magis crescerent; & tantæ essent, ut Germaniā etiā ipsam in periculū adducere viderentur: extitit Henricus Saxo, quem principem Aucupem maiores nostri appellarunt, cuius tanta, tamque excellens fuit virtus, ut non solū Germanorum, sed etiam, eorum qui in Gallia domicilium habebant, Francorum oculi in eum essent coniecti; idemque & lenire desiderium, quod sui reliquerant, superiores illi Carolini optimi principes: & damna, quæ post illos Imperium fecerat, sarcire posse videretur. Itaque cum maiores nostri summam rerum suarum ei commisissent, easdem ita ille administrait, ut Principes nationis nostræ certos ad officium reuocaret; & robustissimas copias Hunorum, qui infestis signis & armis Saxoniarum bellum intulerant, ad Merseburgum prælio vinceret. Ex his quasi fontibus cum ille ad bonam omnium Christianarum gentium existimationem profluxisset, dignitas Imperatoria ad eum singulari earundem consensu delata fuit. Sed cum pro ea, quam e Spiritu sancto hauserat, modestia honorem amplissimum minime appeteret, nec alium e meritis erga Rempub. suis fructum repeteret, quam ut publicis rationibus bene consuleretur: contentus eo, in quo collocatus erat, dignitatis gradu, in altiore illum ascendere noluit: E quo facto eius incredile est, quantum Christianæ virtutis eluxerit: & gloria

gloria eius, quæ ipsum quasi fugientem persequi visa
fuit, quantum aucta cumulataque fuerit. Huius fi-
lius Otho princeps summa virtute, & talis plane, vt
eum Deus ad Imperium Orbis terræ recuperandum
genuisse videretur, cum patri de Germania nostra op-
time merito successisset: certe quam Rempublicā no-
stram ab eo bene constitutam atq; pacatam accepe-
rat, non solum conseruavit, sed etiam auxit atq; mi-
rabiliter ornauit. Qui cum Belgas prælio viatos at-
que fusos in potestate suā redigisset, atq; imperio suo
Boislaum Bohemorum principem, & populū eius for-
tem atq; bellicosum adiūxisset: & maximas Hunorū,
qui eo tempore videbantur perhorrescēda esse bello-
rum fulmina, copias deleuisset: certe virtus huius in
illustri quasi loco sita non potuit alijs gētibus obscu-
ra esse. Ac cum idem omnes ætatis suæ Reges & forti-
tudine, & rerum gestarū gloria superasset, nec haberet
quo cū certaret amplius, seipsum tādem superare non
dubitauit. Quippe qui in maximis victorijs atq; triū-
phis pro ea, quā Deus ipsi inferuerat, caiitate ita mode-
ratus fuit cupiditates suas, vt neminē læderet, ius suū
cuiq; tribueret, & liberare eos, qui seruitute premeré-
tur, q̄ vllis durior esse mallet. Nouerat enim ita armis
suis vti, vt frāgeret supbos, oppressos subleuaret; & de
omnibꝫ, quoad eius facere posset, bene mereretur. Nā
vbi Hugo vir nobilis atq; affinis eius, cuius magnę in
Gallia opes erāt, contra Ludouicum Regem, cuius in
potestate esse debebat, arma nefaria cepisset: tamen
Otho

Otho noster, e cuius regni illius res suas amplificare posset, maiorem officij quam utilitatis suae rationem habuit. Nam exercitum quem compararat, satis magnum in Galliam duxit, tulit auxilium Regi; & Hugo nem principis sui dicto audientem esse coegerit. Ac cum Berengarius & Graeci Italiam vexarent, & ei nationi, quae olim Orbi terrae ius dixisset, leges duriores imponerent: Romani perspecta Othonis atque maiorum nostrorum virtute, ut seruitute turpi liberarentur, fidem optimi huius Principis implorauerunt. Qui cum se non sibi solum, sed etiam patriae, nec sibi & patriae tantum, sed vniuersis gentibus, quae ope sua indigerent, natum esse arbitraretur, Italiae subuenit; Graecos in Calabria & Apulia profligauit; Berengarium autem insolentem compressit ac cepit; easque res in illo Orbis terrae quasi theatro gescit, ut omnium getium animos in se conuerteret; nec faciliter statuas, vtrum hic maiorem fortitudinis suae, an iustitiae atque benignitatis frumentum ceperit. Certe Itali cum beneficio ipsius ad spe pristinae libertatis reuixissent, hunc ipsum tanquam unum aliquem e caelo delapsum, qui rebus suis atque Christianorum omnium afflictis atque laborantibus succurreret, intuiti fuerunt atque obseruauerunt. Et quia maiorum nostrorum virtus illis ita affulserat, ut existimarent non modo non miserum esse in horum venire potestatem, sed beatum plane, salutatus est Otho a Romanis Imperator Orbis terrae, idque singulari totius Italiae consensu & applausu; atque ita dignitas haec

summa

summa cum regno nationis nostræ iterum se coniunxit. Habetis h̄ic Germani primordia Imperij nostri, & intelligitis præclare hoc ornamentum non vi vlla crudeliore, sed pietate potius erga Deum immortalem, fortitudine vera, iustitia atque benignitate nobis partum fuisse; immo Deum ad nos ita detulisse idem, vt ab eo iam tempore suum quasi domicilium in Germania nostra collocatum habuerit. Videtis iam, videtis Principes populiq; Germani, vt Respublica nationis nostræ effloruerit olim; nec rationes huius antè constitui potuisse, quām penesvnum summa eius potestas esset. Ad quem honorem regium cum Imperatoria & dignitas & maiestas accederet, talis extitit Reipub. nostræ forma, vt melior ne excogitari quidem posset; & Germania nostra tanta honoris splendore fuit ornata, vt Sol h̄ic nullum vñquam dederit maiorem. Et quanquam Imperiū, quod Otho ille Magnus in Germaniam nostram intulit, vel retulit potius, magnitudine ipsa non par fuit alijs imperijs, quorum singula in multas gentes potestatem habuerunt: nō minus tamen fuit honore, & beneficentia multo maius. Quippe quod ita se accommodauerat pietati atque legibus Christianis, vt quas vicisset gentes Barbaras non sibi magis quām Christi regno adiungeret: ac Prouincias suas, socios atq; amicos ita tueretur, vt non tam Imperium, quām quoddam Orbis terræ patrocinium esse videretur. Cuius quidem rei cum Henricus primus fortissimus ille atq; optimus princeps rationem habe-

ret, & Sarracenos a ceruicibus Italorum depulit, recepta, quam occupauerant, Capua; & cum Pannonię Regem fregisset, maluit hunc secum affinitate iungi, vt ipse atq; populus eius sacro baptisme initiati Christi regnum augerent, quām in eos, a quibus maiores nostri graues iniurias acceperant, durius aliquid statuere. Quod Imperatoris beneficium prope diuinum quantā vtilitatē vniuerso Orbi Christiano peperit, nō facile dixerim; certe illud satis constat Pannones non minus ab eo iam tempore rebus Christianis profuisse, quām ante nōcuerant. Nā quibus armis Christianorū sanguinē hauserant, eisdē postea Sarracenos atq; Turcas ita profligarunt, vt a nostris atq; alijs Christianarū gentiū ceruicibus arcerētur. Nec minor fuit beneficētia huius eiusdē Imperatoris erga Sarmatas; erga Sarmatas dico: immo vero per Sarmatas erga vniuersum nomē Christianū. Nā cū Regē horū nouis rebus studentem ad officiū reuocasset, facile passus est a se impe trari vt eidē Regi eā ferret opē, qua Rutheni vieti adiūcerentur regno ipsius, & a superstitione ad Christi religionē salutarē traducerentur. Quo tēpore quanta accessio facta fuerit ad res Christianorū, & in virtute atq; potentia Sarmatarū alijs nationibus cōtra immanissimas Scytharū gētes quantū præsidij esse cœperit, res ipsa nobis etiā tacentibus declarat. Sinite me hoc loco præterire Cōradorū atq; Fredericorū nostrorū res fortissime gestas. Qui rebus Christianorum in Asia labrantibus succurrere, & Sarracenis infestissimis Christiani

stiani nominis hostibus, sua atq; maiorū nostrorum capita obijcere nō dubitauerunt. Nā horū consilia atq; facta fortia sigillatim cōmemorare nimis longū esset; illud tamen, quod & res & locus hic postulat, dicendum est omnino, maiores nostros eā iustitiā benignitatemq; cū fortitudine summa coniunxisse, vt ipsorum Imperiū magis beneficentia quam vi constaret. Quippe cum non ad suā potentiam, sed Dei gloriam, & salutē Orbis terrae omnia ipsi referrent. Itaque visum fuit beatū esse nō solum a maioribus nostris defendi, quoties opus esset, sed etiā vinci; cum libertate pristinam non amitterent victi, sed vberiore potius libertate, quæ veram eis felicitatem in Domino nostro Iesu Christo afferret, cumularentur; nec maiorē victores ipsi, quam victi fructum rerū ab illis bene gestarū consequerentur.

Nunc vero cum Respub. nostra tā bene constituta esset, & ei vnius Imperatoris principatus tantum bonorum pareret: ita quidē vsu venit, vt in ea plane beata atq; florente omnes omniū ordinū homines & beatius, & coniunctius inter se, quam ulli vspiam exterarum nationum homines viuerent. Quippe cum nihil eorum, quæ ad optimum Reipublicæ statū pertinent, in ea desideraretur: nec tranquillitas, nec honestas, nec honor, nec dignitas; vt, ad quascunq; viuendi partes se maiores nostri darent, inuenirent quod rationibus suis aptum foret. Ad horum bonorum cumulum accessit religio Christiana & ius æquabile; quibus nihil melius vel esse, vel excogitari potest. Religio; qua-

Christum seruatorem nostrum Optimum Maximum singulari pietate colerent, & e Spiritu Sancto tantum caritatis haurirent, vt idem plane & vellent & sentirent, & inter se arctissime iungeretur; & quod bonorum omnium caput est, Deum per eundem Christum Dominum nostrum perpetuo propitium haberent. Ius autem equabile; quo summi & infimi æque ita teneretur, nulli vt liceret in Republica nostra vim suscipere, ac eos qui minus possent, opprimere. Et quanquā penes Imperatorem erat summa potestas, & videbatur ipse Lex esse quædam viua atque loquens: maluit tamen maiores nostros vti iure scripto, eoque optimo, quam ad suum nutum reuocare omnia; neque id iniuria. Est enim a Platone sapienter scriptum nullam ciuitatem atque Rempub. in qua non lex magistratui, sed magistratus legi imperat, diu conseruari posse. Ac mea quidem sententia ius si scriptum sit, eo pluris faciendū est, quod non, vt homo, gratia aut odio ullius moueri, & ab eo, quod iustum est, flecti potest, sed potius omnibus semper est æquum. Quando autem in Repub. nationis nostræ religioni sic fuit lex adiuncta, vt illa a maleficio auerteret volentes, hæc autem nolentes deterreret, & arma e manibus seditionis extorqueret, homines nostri in officio facile contineri potuerunt; vt vitia fugerent, & recta officia perpetuo præstarent. Breuiter ita comparatum fuit, vt singulorum ordinum homines in patria nostra sic vivere possent, vt nuspiciam melius beatiusq; Nā rustica plebs,

plebs, simul ac leges & iusta Imperatorū potestas Germaniā nostrā latrocinijs ac motibus intestinis repurga uerāt, tueri rē suā familiarē atq; agros colere melius, ex eisq; quos perciperet fructus exportare ad alios, ac vēdere tuto potuit. Ac quo minus facultates huius ab ijs, quorum in potestate esset, exhaustiri aut extenuari possent, cautū fuit, ne canō, quē in singulos annos pēdere soleret, cōtra consuetudinē inueteratā augeretur. Hinc plebis illius opes, diuītiæ, & vita beata. Vrbana autē ab eo iam tēpore, quo Respublica nostra tā bene constituta fuit, non solum, vt ante, operis rem sibi parauit: sed etiam mercaturam exercuit, & in patria pacata mirū in modū creuit. Quæ eadem vrbes, in quas se incluserat, sic muniuit atque ornauit, vt in eis tuto & honeste habitaret. Itaque in natione nostra tot extiterunt ciuitates liberæ atq; florentes, quot in nulla alia natione inuenias. Ac si quæ harū in potestate principum atq; nobiliū essent, harū libertati ita consuluerunt maiores nostri, vt nec ab eis vllū tributum extra ordinem exigi posset; nisi aut ordinū Germaniæ, aut procerum cuiusq; regionis cōsensus accederet. De nobilium autem ordine quid dicam? Ij quidē gradibus iam inde ita distincti fuerunt; vt qui summi essent, ornaretur Principū dignitate; Medij, comitum atq; Baronum; Infimi autem, equestris essent loci. Ac si vspiā, certe in Respublica nationis nostræ magnæ & egregiæ Principum gētes versatæ sunt diu & populis magnis præfuerūt. Comites autem ipsi atq; Barones, quamuis

non tantum possent in Repub. nostra, quantum Principes: tamen ita constitutæ fuerunt rationes eorum, vt locupletes essent; ac si non integras regiones, castella tamen haberent: atq; territoria certa, quibus imperarent. Qui autem inferioris essent ordinis nobiles, cum eoru[m] virtute res militaris potissimum niteretur, in exercitibus maiorum nostrorum semper honestos duxerunt ordines; & domi etiam habuerunt, quo honeste atque utiliter vitâ agerent. Quippe cum rustica plebs & castella certa in potestate ipsorum essent, & ipsi in consilia Principum & Imperatorum adhicerentur, & ciuiibus muneribus, ijsqu[em] honorificis fungeretur. Atq; vt arma, quibus uterentur, haberet expedita, & equos atq; familiam militarem de suo alere possent, ita institutum fuit a maioribus nostris, vt censu abundantaret, nec patrimonij muneribus facultates eorum extenuarentur. Ac cum e censu, agris, & villis tantum, quatum cuique ad se familiamque suam alendam satis esset, perciperent, & rem suam honeste & sine alterius damno augere possent: voluerunt maiores nostri, vt hisce emolumenit contenti fenore atque mercatura abstineret; eoqu[em] ipso prudenter cautum fuit, ne si ijdem illiberali quæstus genere caperentur, angustiores redderentur animi ipsorum; & suam pristinam magnitudinem, sine qua nec domi neque militare res bene geritur, amitterent. Veruntamen cum illi rem suam familiarem non æque, atque plebei homines, augere possent, vt hoc ipsorum quasi damnum quoquo modo sarciretur, tributum

butum fuit eis, vt ad honores cum ciuiles, tum vero etiam Ecclesiasticos acquirendos plus oportunitatis haberent. Quin patria nostra eum approbauit morem, vt non alij, quam nobiles in collegia maiorum Ecclesiarum cooptarentur, & Ecclesia tanquam mater benigna eisdem suppeditaret, vnde commode viuere possent, vt egentibus succurrerent, Deum colerent perpetuo, & Ecclesiæ Christianæ utilem sane operam nauarent. Ac quia ijdem in ora mari Baltici regiones magnas, Prusiam atque Liuoniam, sibi atque adeo Christo parere coegerant, in his & arces & ciuitates condiderunt: atque vt, quæ virtute magna & rebus fortissime gestis sibi ac patriæ peperissent, tuerentur, ex eisque emolumenta iusta caperent, institutus est ordo ille diuæ Virginis, qui regionum illarum potiretur; & cautum ne in hoc veluti sodalitium, cuius partes erant cum gentibus Barbaris, & a religione nostra auersis bellum continenter gere, alijs quam nobilibus Germaniæ nostræ aditus pateteret. Quod cum initio rei Christianæ propagandæ cum primis utile fuerit, vellem equidem a finibus Barbarorum hostium dimoti non fuissent milites illi nostri; eoque minus negotiū, quod magno cum honore nationis nostræ, & utilitate Reipublicæ Christianæ suscepérant, intermisserint: nec coacti fuissent conflictari cum ijs, a quibus si adiuti fuissent, haud dubie maiorem utriusque virtutis suæ fructum cepissent. Sed vt illic reuertar, constat ex ijs, quæ commemorauimus,

postea

postea quām Germania nostra in vnius venit potesta-
 tē, & Romani Imperij dignitas in cā trāslata fuit, non
 solū de libertate huius deceſſisse nihil : sed omnes
 etiam omnium ordinum homines in ea & liberius &
 commodius, quām vllæ vſpiam gentes , vixiſſe. Quin
 tantum dignitatis atque honorū adeptos fuīſſe, quan-
 tum alij aliarum gētium homines vix optare auderēt.
 Quarum rerū cupiditas magnis animis ita sāpe innaf-
 citur, vt sine his se beatos esse posse minime existimēt.
 Est quidem ea iustitiæ ratio , quæ vni tantum tribuit
 quantum alteri, sub quam contractus atq; maleficia
 cadunt, ad retinendum bonum aliquem atque tran-
 quillum Reipub. statum vehemēter apta; sed non mi-
 nus apta, quæ præmia decernit bonis atque magnis vi-
 ris; & dum condicionis cuiusq; virtutis, atq; meritorū
 rationem ducit, non tantum impertit infimis, quantū
 summis; nec tantum ijs, qui sua, quām qui publica ne-
 gotia curant Atque vt vtraque iustitiæ ratio omnem
 hominum societatem probe tuetur, & concordiā con-
 iunctionēmque fouet atque alit: ita si Respub. vlla vel
 vtramque, vel alteram desideret, nec concors hæc esse
 potest, neque beata; cum præsertim in ea magnam esse
 materiam, & quasi segetem odiorum atque factionum
 necesse sit. Quo melius constituta fuit Respublica Ger-
 maniæ nostræ , in qua Principes viri, qui summū no-
 bilitatis splendorem e virtute maiorum suorum trahe-
 rent, excelsam illam, in qua maiores ipsorum fuerant,
 dignitatis sedem hereditario iure obtinerēt; nec facile
 hic

hic eorum locus, cum alijs aliorum ordinum hominibus cōmunicaretur. Qui cum ita nati essent, vt in patria nostra & opibus, & honore florerent, atq; ceteris omnibus antecellerēt: non fuit, cur eos aut condicione suæ, aut patriæ, in qua tam honorati essent, pænitere. Quippe cum horum quidam in eo honoris gradu forent collocati, vt in comitijs Imperatorijs ius haberent suffragij ferendi: & virtus eorundem, cum summa nobilitate coniuncta, in ea ratione tantū haberet prærogatiue, vt ipſi sibi ad Imperatoriam dignitatem, qua nulla post hominum memoriam maior in vlo regno extitit, viam patefacere posſent. Et quanquam Comitum, si qui virtute excellerent, etiam ratio aliquoties habita fuit, tamen ad illam dignitatem summam summo nobilium ordini omnia ſemper faciliora fuerunt; vt non iniuria ex ijs, quæ vulgo euenerūt, statuere posſimus illam in hoc eodem ordine fedem suā quodam modo posuisse. Verū tamen ne medij atque infimi loci nobiles a magnis patriæ honoribus excluderētur, nec deterior effet horum condicio, qui labores pro patria graues fusciperent, & ſe maximis periculis offerrent, quam eorum qui in otio viverebant, & illorum beneficio forent beati: id quidem tributū fuit eisdem, si ad summā Imperatoris dignitatem aspirare minime posſent, alijs tamen magnis in Repub. Principibus dignitate cōpararentur. Institutus est igitur in natione nostra certus Principum honor, ad quem nō tam maiorum imagines atque splendor, quam virtus atq; pietas.

cuiq; sua suffragaretur. Quem sane honorem ita maiores nostri adiunxerūt muneribus Antistitum, vt qui inferiorū essent ordinū nobiles, si quādo de more collegiorū Episcopi crearentur', Principū honore augeantur; & aliqui e numero horū Imperatoris deligēdi potestatem haberent. Quo honore secundū Imperatoriam atq; Regiam dignitatem nullus in Repub. nostra est maior, nullus excellētior. Ac ne virtuti sine nobilitate omnis ad maiores honores aditus claudi videretur, sunt Antistitum sedes certæ; nec ipsæ a Principum dignitate seiunctæ; quas maiores nostri plebeijs etiam hominibus, quorum insignis esset virtus atque pietas, assignatas voluerunt. Quod vero ad Imperatoriam dignitatem sigillatim attinet, quanto meliores, vberiorēsque fructus capiendi erant ex ea ipsa, tanto diligentius cauerunt maiores nostri, ne ad eam minus idonei obreperēt. Quare etsi verisimile erat e bonis parentibus bonos nasci liberos, tamen, quia res ipsa declarabat rem sāpe aliter euenire, Otho tertius de patria nostra optime meritus fuit; cum institueret, vt Imperatores non nascerentur, sed eligerētur; & dignitas hæc virtute potius, quam fortuna acquireretur. Quod eam etiam vtilitatem attulit Reipub. nostrę, vt cum penes Septemuiros, eosq; dignitate præstantes, esset potestas Imperatoris eligendi, si quis beneficio horū crearetur Imperator, eo ipso patrię nostrę ita devinciretur, vt nisi in hanc pectore toto incūberet, turpem ingratitudinis notā atq; infamiā vitare minime posset.

posset. Ac quo minus loci esset ambitioni in comitijs Imperatorijs, cū quattuor essent illorū , qui nō solū suffragiū, sed ipsum etiam Magistratum more maiorū nostrorū inire possent: his tres alij, qui suffragia quidem ferre, sed tamen eligi minime possent, eò quod Ecclesiastici essent ordinis, adiuncti fuerunt. Qui eo minus cupiditate sua praua se corrūpi & transuersum agi paterentur, quod caussam non haberēt, cur diadema Imperatorium ipsi ambirent. Ad hoc institutū accessit alterum non minus bonum atq; salubre; vt qui in illo excelsō honoris gradu collocarentur, ne durius quam oporteret, regnarent, ante quam alijs imperare inciperent, eas leges quodam modo imponerent sibi, nihil vt cōtra Ecclesiā Christianā atq; Rēpublicā nostrā, eiusq; libertatē facerēt. Nec ante ratū esset, quod in deligēdo Imperatore egissent Septemuiri, quam Imperator designatus cū eisdē in leges illas certo pactorū genere cōuenisset; vt homines nostri intelligere possent se nō in Domini cuiusdā acerbioris, sed in patris, eiusq; perbenigni potestate venire. Quod aut̄ ad Principis huius facultates attinet, ne hic tenuior esset, & minus posset quam recta ratio præscriberet, idēmq; accideret Reipub. nostrę, quod corpori humano, si forte caput ei' imbecillus esset: morib' maiorū nostrorū inductum fuit, vt e vestigalibus, portorijs, & tributis Prouinciarū, ciuitatū, atq; regionū nostrarum tātum emolumenti caperet, quantum ipsi ad sumptus necessarios & utiles satis esset. Licuit item ei & pecuniam

extra ordinem imperare, quoties opus esset, & euocare in militiam homines nostros, atq; bella gerere cum Imperij nostri hostibus. Quę si alij Principes suscepissent, iure communi, quo vtimur, non bella iusta, sed quędam potius latrocinia esse viderentur. Quare constat talem Reipub. nostrę statum collocatū fuisse initio, & non ita multo pōst stabilitum, vt melior nec a Deo auctore omnis boni nostri facile impetrari, nec ab hominibus peti posset. Ac cū vnicuique ordini tribueretur, quod suum esset, & quò fieret plane beatus, certe nullus horum caussam habuit, cur non patriam hanc suā amaret, & tāto magis inter se iungerētur omnes, quanto plus adiumenti atq; prēsidij alter alteri afferret. Quo minus loci relictū fuit aut inuidię vlli, aut odio, cum omnes aliorū bonis sua contineri haud obscure intellegerent. Plebs optimatibus atq; nobilibus suppeditauit, vnde laute atq; honeste viuere possent, hi aut illam tutati fuerūt, & etiā cum periculo vite defenderūt. Accum Imperator omnes omniū ordinū homines animo complecteretur, ijdem in huius imperio atq; potestate beatissime cōquieuerūt. Religio autem Christiana, e cuius quasi fonte omne bonū profluere consuevit, maiores nostros ita excoluit, vt ad pristinā horū fidem, constantiam atq; fortitudinem, quas virtutes e disciplina maiorū nostrorum hauserant, accederet pietas vera, accederet coniunctio animorum singularis, accederent alia bonae vitæ officia. Itaq; eis non min' omnia bene, feliciterq; ē euenerūt, quam Iudeis olim,

olim, quoad Deum coluerunt recte, nec ab alijs vitæ officijs decesserunt. Nam tantum bonorum ad maiores nostros delatum fuit diuinitus, vt & viuerent bene beateq;,& summo honoris ac gloriæ splendore ornarentur. Atq; hæc hactenus de optimo Reipub.nostræ statu; in quo nec emolumenntum bonū,nec ius æquabile, nec concordia , nec libertas , nec dignitas vera, nec iustum vnius Imperium, nec deniq; illa sacrosancta Dei immortalis religio desiderari posset. Nunc vero vellem aut eadem Respub. nullas postea labes contraxisset,aut mihi integrum esset easdem ipsas præterire. Quanto enim maiore cum voluptate animi in cogitatione optimarum illarum rerū versor,tanto acerbiore dolore afficior , quoties mihi malorum huius ætatis atque temporis in mentē venit. Verum quia non superiorum ætatum bona recensere, sed etiā quæ posterioribus sæculis accepimus vulnera aperire atq; tractare decreui: si quo modo & hæc sanari,& illa recuperari possint: faciendum est profecto, quod locus hic atque salus publica postulat. Ac primo quidem et si Respublicæ eo minus labefactari possunt, quo melius constitutæ sunt: tamen cum ita comparatum sit, vt non minus quam aliae res humanæ sint mutabiles, & harū,vt Plato inquit, conuersiones naturales: profecto cum diu & aliquot sæcula floruisset Imperium Germaniæ nostræ, ita tulit tandem casus rebus nostris infestus, vt post mortem Frederici secundi idem duodeuiginti annos Imperatore careret. Interea cum ma-

iores nostri non haberent, cui parerent vni, optimam illam, de qua egimus, Reipub. suæ formam prope amississe videntur. Quam etsi postea per Rodolphū Habsburgum Respublica recuperauit, nō ita tamen, vt ante inter regnum floruit. Nam quo tempore Magistratus Principesq; nationis nostræ præsidio Principis sui nudati erant, nec habebant a quo defenderetur, opes ipsi suas, quibuscunq; rebus possent, firmarunt; & multa eorum, quæ ante Imperatorum fuerant propria, ad se transtulerunt; vt cum quisq; in ciuitate atq; ditione sua & regenda & tuēda munus Imperatoris obiret, ipse eius neruis & quasi viribus niteretur. Ac cū Magistratus Principesque nostri illa usurpassent aliquādiu, nec sine vi ab eorū possessione dimoueri possent, maluit Rodolphus de iure suo decedere, quam offendere voluntates eorum, quorū opera & domi & militiae utiliter vti posset; nec suspicatus fuit vñquā fore, vt q; ex ipso quasi patrimonio Imperij creuissent, nō obtēperaturi essent sibi, posterisq; suis vltro, nec Répub. gratis animis adiuturi. Et quanquā Princeps hic statuebat se Imperiū beneficijs multo facilius, quam vi atq; armis tenere posse, decessit tamē nō parū de publicis Imperij eiusdē facultatibus atq; emolumenis. Quin ab eo tempore indies magis ac magis extenuata fuerūt iura atq; vectigalia Imperatorū nostrorū, vt post Carolū IIII.e publico nostro & vectigalibus Imperij nō modō nō neruos bellorū, sed ne pacis quidē subsidia ampli' Imperatores nostri habuerint. Debilitauit quidem

dē ratio hæc potestatē, quā penes esse debebat summa
 rerū nostrarū, atq; ita cōuulsit, vt quibus Principibus
 populisq; Germaniæ imperare oportebat Cœsarē, eorū
 ipse nutū intueri quodā modo cogeretur: cū p̄sertim
 ei non amplius liceret pecuniā atq; militē, sine quibus
 nihil rerū magnarū bene gerī potest, populis Germa-
 niæ nostræ imperare, nī Principū atq; Ordinū cōsen-
 sus publicus accederet. Quāquā autē dignitas atq; ma-
 iestas Imperatoris nostri postea nō ijs opib⁹, nec ea po-
 tentia, qua oportebat, sustētata fuit: tamē benevolētia
 atq; virtute hominū nostrorū nixa stetit, vt Resp.no-
 stra etsi foris minus gloriose, tamē domi satis bene ad-
 ministraretur; quoad boni illi atq; antiqui mores in na-
 tione nostra viguerūt. Nā & hoīes nostri iuncti fuerūt
 inter se, & Imperatore obseruarunt, & patriā ita ama-
 rūt, vt se pro ea grauissimis offerre periculis, atq; vitā
 adeo suam profundere non dubitarent. Quibus vt ni-
 hil fuit antiquius, quām honeste viuere, ac de patria
 bene mereri, ita vicissim nihil odiosius, quām turpiter
 viuere & patriā deserere, vt Respub.nostra cū minus, q̄
 ante, posset, moribus tamen bonis hominū nostrorū
 seipsam satis bene tueretur; & appareret verissimū esse,
 quod sapientissimi homines in ore habent, non esse,
 cur quisquā statū Reipub.bonū non virtute potius ac
 pietate, quām pecunia, opibus, potētia metiatur, cum
 finis eiusdē sit ipsa bene beatēq; viuendi ratio. Verum
 tamē cū Princeps nationis nostrę summus imbecillior
 foret, periculū erat, ne, quēadmodū corpus humanū,

si ali-

DE REPUBLICA

si aliqua potiorum huius partium languescat, ipsum ægrotare incipiat grauius: ita Respub. etiam nostra in languorem pernitiosum incideret. Itaq; aui, ataui, atque maiores nostri cauerunt sane diligenter, ne mores illi hominum nostrorū boni, quibus Respub. nostra sustentari videbatur, deprauarentur; & eam inierunt rationem, vt quas fortè officij atq; disciplinæ quasi habenas attenuatio Imperatoriæ potestatis laxaret, eam legum seueritas astringeret. Est enim magna quedam inter magistratum & legē coniunctio. Quare lege publica interdictum fuit, ne quis maiestatem Imperatoris laderet, neue vim publicam in Repub. nostra suscipieret: qui autem contra fecisset, grauissima poena afficeretur. Atque hæc quidem lex primò ab Henrico II. lata, & deinceps ab alijs Imperatoribus saepe renouata fuit, vt non facilè vlo tempore antiquari posset. Quæ cum alios fructus, tum eum attulit Reipub. vt, qui fortasse nouarum rerum cupidi essent, statum huius non facilè labefactare possent. Ac quo minus nobiles, in quorum virtute magnum semper præsidium fuerat Reipub. nescio qua licentia fierent detersores, atque corrumperentur: non passi sunt maiores nostri leges censorias e Repub nostra tolli; sed quicunq; nobilium grauibus se criminibus obstrinxisset, & Republicam eiusque principes læsisset in certaminibus, quæ instar Olympiadum Græcarum instituta fuerat, publice inspectante tota fere Germania infamia graui notati fuerunt; vt quos caritas patriæ atque Imperatoris

ratoris auctoritas in officio non contineret, pœnæ atque infamiae metus a sceleribus deterreret: eoq; minus ordo hic Rempub. armis, quibus eam sœpe tutatus fuisset, dilaceraret. Cautum item fuit prudentissime, ne disciplina militaris, quæ Reipub. nostræ non solù vtilitatem magnam, sed etiam ornamenta præclara pepererat, facile depravari posset; neque id iniuria. Etenim si vllorum hominum, certe militum vita ac mores arctiorem seuerioremq; disciplinam desiderant. Quæ si laxatur, hi in illa gladiorum suorū licentia cupiditatibus suis non facile vllum statuunt modum; & non solù hostibus, sed etiam socijs, amicis, atque Prouincialibus sunt infesti; nec ijs, quos habet contubernales, parcunt, ab eisque manus abstinent. Hinc motus illi militares, hinc seditiones, quæ & Imperatores & magnos exercitus sœpe cuerterunt. Itaq; iure laudatur iusta seueritas Aureliani Imperatoris; qui, vt milites a prauitate morum ad officium reuocaret, imperauit Tribuno suo, ne pateretur militem vllum rapere alienum pullum, ouem vlius contingere, vuam auferre, segetem deterere, oleum, salinum exigere; & addidit, suo quemque stipendio contentum esse oportere. Nec minus laudandus est noster Federicus ille tertius; qui, vt licentia militaris reprimetur, legem tulit de sententia ordinum Imperij, idque Francoforti; ne per milites staret, quo minus in Germania atq; Prouincijs nostris liceret populis cuiusq; loci ex agris atq; vineis fructus natos capere sine me-

E tu,

tu, & in villas atq; domos suas conuechere. Itē, ne milites igni vastarēt villas & regiones, néue clericos, mulieres grauidas, & homines morbis graibus affectos, peregrinos, mercatores, & aurigas, si qui merces depotarent, læderent, néue templa & delubra Dei immortalis violaret atq; deriperēt, & res earū sacras ad se trāf ferrent. Hi mores, leges atq; instituta eam vtilitatem Reipublicæ nostræ attulerunt, vt quē maiores nostri huius statum bonum atq; concordem collocauerant, idē retineri posset: & quāto plus de potestate Imperatoris decesserat, tāto magis leges optimē illæ Rép. nostrā iuuarent; & quod amiserat illa, quodā modo restituerent. Ac quoniā maiores nostri intellexerunt præclare hēc esse illa ipsa vincula, quibus Resp. nostra cōtineretur, nō modō nō passi fuerūt, ea vllis improborū atq; seditionorū hominū consilijs rūpi: sed in cōuentibus posterioribus hēc eadē astringere etiā non dubitaverunt. Atq; hoc quidē & bonū fuit per se, & publicis rationibus eo vtilius, q; ordines nostri eo, quod ipsi scierant, iure, & de quo cum Imperatore quodā modo pacti fuerant, libentius vterentur. Videmus iam vt lex muta opē tulerit Magistratui nostro summo; qui idem esse debebat lex loquens, qua homines nostri bene & vtiliter regerentur. Atq; vt illa vim suā haberet, cōstituit Imperator iudiciū quoddā, a quo nihilo magis, quam a seipso vlla esset prouocatio. Ac quo minus iudiciū hoc iniquū vlli esse videretur, ea consilij ratio inita fuit, vt qui in hoc adsciscerentur Assessores. ex

omnibus regionibus nationis nostrę, hi essent excellēte virtute omnes prædicti, & partim iure consulti, par-
tim vero nobiles, quorum spectata & talis esset pru-
dētia, vt ex equo ac bono iudicare valerēt. Iā vero cum
Reip. nostræ nec leges bonæ, nec iudicia, neq; hoīum
nostrorum studia recta deesset, Imperator ipse in iure
publico atq; voluntate Ordinū tantum habebat præ-
fidij, vt seditiones atq; sceleratos cum quadā seuerita-
te coērcere, & Répub. ipsam satis cōmode tueri posset.
Et quanquā huius rei ratio satis explicata fuit aliquā-
diu, tñ cū Principes certi, atq; ciuitates Germanię no-
strę simultates, nescio quas, inter se gerere cœpissēt: ne
ea res caussā daret fœderibus, quibus alteri cōtra alte-
ros opes suas firmare studeſet, atq; ita Répub. in factiōes
distraherēt: Imperator Maximilianus fortissimus atq;
prudētissimus Princeps de sentētia Ordinū lege cauit,
ne vllus Germanorum contra legē de pace publica se
cum alijs Germanis vlo fœdere iungeret; néue bellū
sine auctoritate publica susciperet; aut societatē cū ex-
teris gentibus, earūue Principibus coiret. Magnū sane
fructū hæc lex Reip. nostræ attulit, & ad retinendum
quietū huius statū fuit lōge aptissima. Cū pr̄sertim in
eam Imperator & maiores nostri certo pactorū gene-
re ita se astrinxissent, vt oīa fœdera eorum, qui nec iu-
re æquabili stare, nec iniuria abstinere vellent, exclu-
derentur. Fuerunt leges, quas commemorauī, patriæ
nostræ cum primis vtiles, & quamdiu ab hominibus
nostris legum earundem iuris, concordiæ, pacis ratio-

habita fuit, tamdiu ea satis beata fuisse videtur; sed ta-
 men tamdiu non dico beata esse, sed ne stare quidem
 potuisset, nisi ipsam religio Christiana fulsisset. Quip-
 pe quæ ducere solet homines ad fontem benignitatis
 diuinæ, vnde eam vim Spiritus sancti hauriant; vt cu-
 piditatibus suis improbis imperare, honeste viuere,
 patriam complecti possint: malintq; vitam amittere,
 quam hanc eandem deserere. Ad Dei autem gloriam,
 quæ caput est bonorum, referant omnia, vt siue priua-
 tim, siue publice quidquam agant, non in sua virtute,
 sed in Dei potius beneficentia spem ponant: seq; mi-
 sericordiæ eius, atque benignitati totos committant.
 His omnia solent esse secunda, fausta, atq; felicia: &
 tanto id quidem magis, quanto de religione Dei im-
 mortalis minus dissentunt; vt mihi quidem videatur
 Respub. eorum, qui cū Christo ciuisque corpore, quod
 est Ecclesia, sunt coniuncti, non minus facile dissipari
 posse, q; impiorum atq; sceleratorum hominum gre-
 ges diu conseruari solent. Dederunt huius rei signum
 illustre gentium certarum, earumq; impiarum impe-
 ria; quæ ita conciderunt, vt iam ne vestigium quidem
 eorundem ullū extet. Verū Resp. & regna certa, quo-
 rum idem de religione sensus semper fuit, & cōseruata
 sunt diuinitus & perpetuo floruerunt. Nec minus bea-
 ta esset natio nostra, nec minus dico? immo multo etiā
 beatior, si de religione Christiana idē nos sentiremus.
 Etsi enim de Imperatorū nostrorū potestate superio-
 ribus temporibus nimis detractū fuit, tamen quādiu
 homi-

hominū nostrorū de religione sensus fuit concors, hi
 nihilo minus Principibus illis suis paruerūt, q̄ si potē-
 tissimi essent. Quippe cū in animū suū inducerent, eū
 qui Principi aut Magistratui suo nō obedit, labi turpi-
 ter, & a conscientia recta prorsus discedere. Itaq; cū in
 potestate Principis sui esse boni oēs vellēt, vt debebāt,
 facile compresserūt eos, qui cōtra eundē Principē aut
 Rempub. se commouissent: atq; ita multarunt, vt do-
 cumentum daretur, quantum Germaniæ nostræ præ-
 sidij esset in virtute, benevolentia, & obedientia iusta
 hominum nostrorū; præsertim cum milites etiam no-
 stri eam haberent rationem officij recti, vt quoties a
 Regibus exterarum gentium conducerētur, in sacra-
 mento militari Imperatorem atque Imperium nostrū
 exciperent; & mori mallent, quam contra patriam ac
 Principem nostrum arma ferre. Quare Imperator no-
 ster virtute, atque voluntate bona hominum nostro-
 rum tantum potuit, vt non solū Rempub. nostram
 domi satis bene tueri, sed etiam Prouincijs nostris sub-
 uenire posset. Et in hoc quidē patrię nostrę statu, quo
 quisque hominum nostrorum excelsiore erat animo,
 eo magis expetebat, vt Imperium patriæ nostrę in pri-
 stinum restitueretur statum, eumque optimum; & ita
 quidem restitueretur, vt non solū nationem nostrā
 atque Prouincias huius tueri, sed etiam hostes Chri-
 stiani nominis a ceruicibus aliarum gentiū arcere pos-
 set. Ad cuius quidē rei spem hominibus nostris quod-
 dam veluti signum toties sustolli videbatur, quoties

vnum aliquis Principum Austriacorum, qui cum alijs virtutibus, tū pietate semper ornatissimi fuerūt, Imperator designaretur. Vetus fuit Rodolphus, qui primus tantum decus in gentem Austriacam intulerat, Rempub. Germaniæ nostræ non solum cōseruare, sed etiam amplificare posse; si ij, quos habere debebat bellorum nerois, ipsi non nimis accisi fuissent. In Alberto autem tanto maior fuit spes, quanto fortunæ eius fuerunt ampliores: hic nanque cum ditione Austria-
ca regnum Pannoniæ atque Bohemiæ coniunxerat. Sed cum ipse Germaniæ nostræ ante eriperetur morte, quām ea, quę de omnibus commodis ornamentisque eius cogitarat, cōficere posset, bonis omnibus grauiissimum sui desiderium reliquit. De Federico autem tertio quid dicam? qui cum non æque potes esset, atq; Albertus agnatus fuerat, & artibus pacis magis quām belli delectaretur: tamen consilio, quo abundabat, viā nepotibus atque posteris suis ad magnam potentiam muniuit. Etenim affinitate cum Carolo Burgundionum duce contracta, & hunc, qui antea ipsi iniquior fuerat, conciliauit sibi; & pietate, qua excellebat a Deo immortali impetrauit, vt idem Carolus non modo non cum eo de Imperio certaret amplius, sed societate potius atque amicitia optatisima iungere-
retur; & nepotem e filio Federici Philippum ditio-
nis suæ, quæ per Belgas ac Sequanos late patebat, heredem relinququeret. Sic Deus Principes pios atque iustos iuuare consuevit, vt hostes etiam, qui eis nocere volunt,

volunt, mutata sententia profint. Nam ab eo iam tempore Austriaca domus mirum in modum creuit; vt enim Maximiliano matrimonium cum Maria Caroli filia vtile fuerat atque faustum, ita matrimonium Philippi cum Ioanna Regis Hispaniarum filia ad eum liberos, nepotesque ipsius regna Hispaniarum, Neapolitanum, atque Siciliæ iure hereditario detulit. Erat quidem Maximilianus virtutibus summis præditus; & postquam singulari totius Germaniæ applausu Imperator renunciatus fuerat, nihil eorum, quæ ad officium boni Principis pertinent, prætermilit; & documenta statuit illustria, quantum consilio, virtute, atque fortitudine valeret; tum ea erat comitate, vt non solum nostrorum hominum, sed etiam exterarum gentium voluntates si bi facilè conciliaret. Rem autem militarem ita excollerat, vt parua sæpe militum nostrorum manu maximos exercitus hostium deleret; & quoties signis collatis cum eisdem pugnaret, toties & signa daret virtutis cuiusdam excellentis, & victorias gloriosissimas referret. In hunc cum omnium Christianarum gentium oculi essent coniecti, idemque nihil optaret magis, quam vt rebus Christianorū pacatis bella, quibus ijdem seipso cōficerent, in Turcā nominis nostri infestissimum hostem communi omnium cōsensu transferrentur, & iam huius rei cōsilia non dissimulanter captaret: enī tibi moritur hic optimus, fortissimusque Princeps suo quidem tempore, cum spiritus eius

cius in illas cæli sedes beatissimas haud dubie migra-
 ret; nostro verò, non item. Atque hunc vt Patrem pa-
 triæ Germania nostra cuncta nō ante destitit lugere,
 quām Carolus noster quintus (quem ego Principem
 semper honoris amplitudinisque caussa nomino) op-
 timo auo optimus e filio nepos successisset. Qui cum
 & vellet pro ea, qua ornatus erat virtute de patria no-
 stra atque vniuerso Orbe Christiano bene mereri, & idē
 posset, cum hoc Imperatore nullus post Carolum Ma-
 gnum potentior ad Rempub. nationis nostrę accessis-
 set: Deus certe illum ita genuisse videbatur, vt per eū
 Imperium nostrum non solum stare, sed etiam reflo-
 rescere & pristinum suum splendorem recuperare pos-
 set. Nec Princeps hic fefellisset spei nostram, si virtuti
 atque consilijs eius euentus respondisset. Sed hic non
 ita multo post quām Magistratum illum summū inie-
 rat, quę contra communes Christiani nominis hostes
 capere debebat arma, eadem contra Christianos cer-
 tos, eosque potentes, vt sua defendere posset, ferre co-
 gebatur. In quo tamen ipso cauit diligētissime, ne mi-
 norem clemētiæ, quām fortitudinis fructum caperet:
 & ne hostes magis, quām seipsum vincere videretur.
 Nam victis illis atque captis tam benigne fecit, vt faci-
 lè omnes inteligerent malle ipsum cū ijs, quos socios
 habere debebat, colere amicitiam, quām armis dimi-
 care. Gessit quidem Princeps hic res maximas, nec ei,
 qui virtute & rerum gestarum gloria alijs regibus atque
 principibus Orbis terræ logo interuallo antecellebat,

ad summum decus deesse quidquam videbatur, quām quod qualia de alijs Barbaris & Christiani nominis hostibus trophyæ in Africa posuisset, talia in Europa constituere non posset; & quibus armis insulas amplissimas, quæ ipsi e mari Occidenti quodam modo natæ fuerant, domuisset, eisdem Turcas non frangeret; nec horum metu Austriae maiorum suorum atq; Ferdinandi fratris coniunctissimi & Regis longe optimi sedem liberaret. Et quanquam in eam rem fortia sepe ac Christiana consilia inierat, tamen ita tulit casus rebus nostris infestus, vt quoties bellum sacrū suscipere vellet, toties iniuria eoru, a quib⁹ minime oportebat, consilium illud bonū atq; salutare mutare cogeretur. Velle hoc loco quæ reliqua sunt, nec sine acerbissimo animi dolore cōmemorari queunt, præterire possem: sed quia hēc a me suscepta est oratio, nō vt iniuriā vlli aut dolorem, sed potius vt medicinā rebus nostris languētibus, si quo modo possim, faciā, dabitis hāc veniā mihi, vt quę sentio, & locus hic postulat, libere dicam.

Atq; vt ad secundum instituti nostri locū veniam: et si in virtute atq; potentia Caroli Imperatoris multū nobis Germanis pr̄esidijs esse videbatur, & sub Imperio eius ita exulta fuerūt ingenia nostroru hominum, & rei militaris scientia, quam a maioribus nostris quasi per manus traditam acceperāt, ita viguit, vt patrię non solum adiumento, sed etiā ornamenito esse possent: tamen tanta morum peruersitas incidit in tēpora eiusdem Imperatoris, vt patriam ipsi nostrā oppugnauisse

magis, quam iuuuisse videamur. Quamdiu in natione nostra de religione Dei immortalis concors & idem sensus fuit, homines nostri patriā amauerūt; & cōmunem huius vtilitatem cōmodis suis priuatis anteposuerūt; vt cū Imperiū nostrū tenuius esset, his tamen moribus status eius cōseruaretur. Fuit nanq; religio fundamen-tū illud, quo idem Imperiū primū niti cœpit; & po-stea sustentatū fuit, quō ad ipsam idem omnes sensimus: sed non ita multo post, quam Carolus noster designa-tus erat Imperator, euenit, vt dissensio quædā de reli-gione Dei immortalis oriretur. Que, vt fit, in conten-tionem erupit; contentio materiā subiecit odijs, odia autē Ecclesiam in parteis distraxerunt. Ac si vllū, certe hoc factionis genus concordiæ, otio, atq; paci est ini-micum. Nam alij factiosi prōpterea oderunt aduersarios, quod putant eosdem aut vitā, aut honorem, aut fortunas sibi eripere velle. At qui de religione inter se litigant, eo maiore nocendi cupiditate inflammantur, quod metuāt, ne si forte ab inimicis vieti fuerint, atq; oppressi, salute æterna cuertantur. Quod cū animad-uerteret Carolus, vt magnā & a religione & ab Im-pe-rio nostro pestem auerteret, salutaria ſēpe captauit cō-filia, quibus schisma ipsum tolli, & concors Germaniæ ſtatus collocari posset; nec prætermisit quidquam eo-rū, quæ ad eam rem conficiendam pertinere videren-tur. Sed tantum abfuit, vt hic optimi Principis cona-tus optimus nobis cōſuleret, vt indies magis ac magis animi hominū nostrorū exulceraretur. Quin eo reci-derunt

derunt omnia, vt præclare ageretur nobiscum, si quæ
vim habere deberent medicamēti cuiusdam, non per-
niciem afferrent. Quippe cū schisma ipsum nō modò
non sedaretur, sed indies magis ac magis ingrauesce-
ret, nec religionem solùm perturbaret (quod tamen
caput erat malorum) sed etiam omnia Reipub. nostrę
fundamenta conuelleret. Sustulit id primū bencuo-
lentiam hominum nostrorum; & fecit, vt rustica plebs
non ita, vt ante, nobiles, quorū in potestate more ma-
iorum esse debebat, obseruaret. Hinc illud ipsum belli
incendium, quo tota fere Germania arsit, & quod vix
tandem multo multorū sanguine extinctū fuit. Hanc
calamitatem secuti sunt motus Principū virorum, qui
spretis legibus maiorū atq; iudicijs equeis rem gesserūt
vi, & ipsa patriæ viscera crudelē in modū lacerauerūt.
Ac ne quid nobis deesset ad summā calamitatē, inuerti-
sunt in Repub. nostra potētes homines, qui coierūt cū
vicinis Regibus, ijsq; infestis nomini nostro, societa-
té nefariā vexandæ patrię atq; Germaniæ nostræ; idq;
cōtra, quām nō solùm leges & boni maiorū mores, sed
etiā ipsum nature ius prescriberet. Quin extiterūt, qui
cū tēporibus se valere arbitrarētur, magna vi atq; ani-
morū impetu maiestatē ipsam Imperatoris imminue-
rēt, & conarentur e manibus eius sceptrum, & gladiū,
qui ei a Deo quodā modo porrectus erat excutere; &
ipsum a sede Imperatoria, in quā summo bonorū om-
nium applausu collocatus erat, deicere. Cetera malo-
vos tacitos cogitare, quām vulnera illa Reipub. nō sine-

grauissimo & vestro & meo dolore commemorando
ipse refricare. Quid multa? Quo tēpore nos oportuit
ad eam curam incumbere omnes, vt beneficio Princi-
pis nostri, qui pro incredibili virtute sua vellet Rem-
pub. nostram constituere, salui atque beati esse posse-
mus, nos ipsi, nos inquam patrię, & nobis quodam mo-
do ipsis infesti fuimus; & ita restitimus eidem Impera-
tori nostro, vt quod gloriose conaretur, efficere mini-
me posset. Itaq; non miror equidem quid sit, quod cū
aliarū gentiū, quæ in Caroli nostri potestate erant, res
florerent, nostræ autem conuulsæ sint. Nam cum illæ
Principem illum obseruarent, eiusq; dicto audientes
essent, dignitatem eius tuerentur, & ad publica patrię
suæ commoda referrēt omnia, non minus creuerunt,
atq; sibi ac patriæ eidem verā gloriā pepererūt, quām
nos cū contrariā vitæ rationē sequeremur, & nos ipsos
& patriā nostrā magno cū dedecore nostro affiximus.
Ac quia legū vincula, quæ potētiores in officio conti-
nerent, & præsidio essent Imperatoriæ potestati, disru-
pimus omnia, & disciplinā rei militaris ita corrupimus
ipsi, vt multi militū nostrorū malint patriā populari,
quām externos hostes ab hac arcere, nec ita magna ha-
beatur ratio Imperatoriæ cū auctoritatis tū vero etiā
potestatis: nō iā miror ego quid sit q; nō eque, atq; alię
quibus imperauit Carolus ḡetes, floreamus; sed, q; non
iā diu funditus interierim⁹. Cū præsertim sublata e Re-
pub.concordia & Imperatoria dignitate debilitata, in
quo ante quām Imperiū nationis nostrę cōstitueretur
fuit

fuit hæc statu pernicioſo, in cūdem quodā modo re-
ciderit; & Imperator potestatem suā, quam summam
vnus habere debebat, prope amiserit. Sic ēním venit
vſu, vt ſimul ac vinculum caritatis, quod religio attu-
lerat, ſublatum fuit, omnia noſtra ruerent atque di-
laberentur. Quin faſtiones, quas discordia in nationē
noſtrā inuexit, quales ſint & quām pernicioſe huius
peſtes, declarant multi maximarum Rerum publica-
rum perhorreſcendi caſus; & Christus ipſe Dominus
atque Seruator noſter, qui ſumma auſtoritate hoc edi-
dit oraculum fore, vt regnum omne pereat, quod in ſe
diuifum eſt atq; distractum. Hinc ille impendentium
periculorum metus, qui bonorum omnium animos
vehementer perturbat; hinc eorum, qui de nobis nul-
lum faciunt male cogitandi finem, exultans leſtitia, dū
iam quæ noſtra ſunt ſpe atq; cupiditate deuorare vidē-
tur. Ac ſi potentiores noſtri, qui tam proclives ſunt ad
ſeditiones atq; motus intellinos ſuis ipſi armis patriā
frangere non defierint, quid tandem, quid huic fu-
rum erit? an censetis gladios Turcarum truculentiffi-
morum hostium ſanguine Christianorum ſtillantes
conquieturos eſſe? an censetis alios vicinos occaſione
tam optatam nationis noſtræ dilacerandæ non arre-
pturos eſſe auidi? an censetis Rutenos, post quām Pro-
uinciam longe lateq; patentem nobis anno ſuperiore
eripuerunt, nō ſecuturos eſſe victoriam? prætereo hīc
prudens voluntates eorum, qui cum amici, atque fo-
cij noſtri videri velint, Imperium tamen noſtrum at-

D E R E P V B L I C A

tenuare, & Prouinciales nostros in suam redigere potestateni non dubitant. Sunt haec quidem talia, vt in clarissima luce versentur. Quare si de his longior fuero, ineptus sim; illud tantum, quod res est, dico Répub. nostrâ languere; & quibus hec rebus antehac nixa stetit, has oes temporibus hisce calamitosissimis ita esse labefactatas, vt nisi primo quoq; tēpore vtilia patriæ nostræ atq; salutaria cōsilia ceperimus, periculum sit, ne breui funditus sit peritura. Sed quia tamen Ferdinandus Imperator longe optimus fratri optimo successit, idēq; ea cum prudentia, tum pietate præditus est, vt ad Imperium nostrū instaurandum, & res optime gerendas natus esse videatur: saluti equidē desperare nequeo. Nam cū hic omnia non ad suā, sed Dei gloriam referat, nec pro incredibili virtute atq; animi constātia minus secundis rebus efferatur, quam aduersis deiicitur: spes ostenditur Deū immortale tantum felicitatis ad eum delaturū esse, vt res nostras labascentes non solum fulcire, sed etiam ornare possit. Cum præsertim ita se gerat ipse, & ea benevolentia omnes omniū ordinū nostrorū homines sibi deuiciat, vt non solum eos, in quibus virtus maiorum nostrorū nec dum obsoletuit, in potestate sua habere, sed etiā eos, qui antehac duriores aliquanto fuerunt, flectere, & in viā reuocare posse videatur. Itaq; etsi imminentiū periculorū metu pæne frangor & vehementissime doleo, quā Remp. nostram maiores nostri magna cum gloria constituerunt, & tutati fuerunt, ea culpa nostra dilabi & quodā modo

modo ruere:tamen non ita contraho animum, vt in rebus difficillimis non bene tandem sperem; Quippe cum videā magnas dari oportunitates hoc tēpore Rei pub. eiusdē reficiēdæ,cōſtituendæ, atq; adeo ornādæ.

Venio igitur ad id, quod me tertio loco dicturum proposui,&,qua consiliorū ratione rebus nostris languentibus mederi possimus, ostendā. Ac primū vt morum corruptela, discordia, & minor, quàm par est, Magistratum auctoritas atq; potestas faciūt, vt Repub. non modò non florere, sed ne stare quidē possint: ita virtus ciuum,concordia, & iusta Magistratum potestas easdē continēt, tuentur, fouent. Nā Deus non minus bonos respicit perbenigne, quàm improbos male multat,nec minus consentientes & amantes patriæ amat, quàm factiosos affligit;nec deniq; minus Répub. cā, cuius Magistratus tantum potest quantū debet, cōseruat, auget, amplificat, quàm eam hominum societate,in qua ciues peruerso quodā more , quibus parere debet, imperat,& eorū iustū imperiū recusant, angue peius odit atq; detestatur. Quare vt grauissimarū calamitatū metu nos tādē ipsos liberare, & patrię cōſulere possimus, pestes illas, c quibus Resp. nostra hoc tēpore languet quàm primū euellamus necesse est; vt quo-ad eius fieri potest, virtutē maiorum nostrorum, sensum concordē, & cā, quæ necessaria cum primis fuerit, Imperatoris potestatē recuperare possimus . Nā cum his rebus Imperium nostrū partū sit initio, nō alijs cōmodius retineri vel instaurari poterit. Sed ante q; e ciūli ratione attulero, quę ad ré p̄tinere videbuntur, de schismate

Schismate horum temporum agam. Quod cum fons sit & origo malorum nostrorum, quibus hoc tempore affligimur maxime, hoc eodem sublato, reliqua nobis haud dubie omnia ad Rempublicam constituendam crunt faciliora. Atque idem schisma tanto magis fugiendum est nobis, quanto magis in Domino nostro IESU CHRISTO unum esse omnes debemus. Est quidem Ecclesia sponsa Christi, atque huius adeo corpus: ut qui eam dissipat & schismate diuellit, quam huic iniuriam facit, eandem Christo ipsis inferre videatur. Quare Paulus Apostolus obsecrat Corinthios per nomen Domini nostri IESU CHRISTI, ut idem sentiat & loquatur omnes, nec sint inter eos schismata. Deus autem ut ab hoc scelere nos deterret, schismaticos exquisitiore quam alios facinorosos suppicio affecit: & quod ante inauditum fuerat fecit, ut Dathan & Abiron hiatus terrae modo quodam perhorrescendo absorberet. Extiterunt, qui corruptelas & vitia ex agro Domini euellere vellent, idque bonis omnibus applaudentibus: neque esset, quamobrem vel consilij, vel facti eorundem nos peniteret, si non longius quam moderata ratio ferret, prouecti fuissent. Sed cum hi Ecclesiam quam iuuare debebat, schismate & perturbassent, & distraxissent, secuta sunt ea, que vos tacita cogitatione complecti malo, quam de rebus asperrimis asperum aliquid proferre; illud tamen quod huius loci est pretermittere nec possum, nec debeo, eos qui profitebantur se languores Ecclesiae curare cupiditate contentio-

rum, et quod in aliis, quibus omnius regnus et in his

scriptis.

nis incitatos, fines iustos correctionis trāsilijsse. Quin eò prolapsos fuisse, vt non tam repurgarēt Ecclesiam melioremq; facerēt, sed vt eadem sublata nouam nescio quam fabricarentur. Si domus aliqua aspersa nescio qua labe deformior sit aliquanto, situm est in potestate Domini vel repurgare eandem, vt pristinam formam bonam recuperet: vel diruere, vt aliam dominum, eamq; pulcriorem construat; cum sub hac noua aut melius, aut æque bene contra tempestatem aëris tectus esse possit. At Ecclesiæ longe alia est ratio. Quippe cum vna sit ipsa, vna nimirum illa columba, de qua Salomon in Canticis canticorum; & vnum unius capitii, videlicet, **CHRISTI** corpus, nec alibi vspiam cubet **CHRISTVS**, & Spiritus sanctus tanquam in templo suo vigeat. Itaque qui hanc deserit, & nouam in qua viuat, querit, seipsum fallit; & si forte peregrino cœtui se adiungat, in eum locum venit, vbi nec Christum, nec Spiritū sanctum inuenire, nec ex vtroq; salutem haurire possit. Quò maiore cū pernicie sua errant schismatici omnes, cum & Ecclesiam veram atque Germanam deserunt, & alios huic cœtus anteponunt. Quid igitur est? Certe vt ij, qui Ecclesiam veterem repurgandam censem, vt melior fiat, & pristinam suam formam, eamque pulcram recuperet, me non modò non repugnantē, sed etiam consentientem habent: ita consilia eorum, qui illam non repurgare, sed disturbare atq; oppugnare conantur, probare nec possum, nec debedo. Breuiter schisma non medi-

camentum est, quo Ecclesia languens curetur, sed venenum, quo eadem colatur. Positum est enim in ipsa natura rerum, ea, quæ diuiduntur, non minus recidere ad nihilum, quam quæ in vnum contrahuntur firma sunt atque stabilia. Conscinde vestem, & vestis non erit amplius vestis: disisce parietes domus, & domus non erit amplius domus: disseca corpus humanum, & pro corpore partes quædam putridas reliqueris. Quod ipsum quale sit, & quam perniciosum, si in vlla alia re, certe in Ecclesia cernitur. Quidquid enim ab hoc vno vnius CHRISTI corpore auulseris, vitam amittit, & computrescit. Quin immo quatenus Ecclesia in parteis distrahitur, eatenus CHRISTVS per summam iniuriam diuiditur. Nam, vt Paulus inquit, *Significatum est mihi ab ijs, qui sunt Chloës, quod sint contentiones inter vos; hoc autem dico, quod vnu quisque vestrum dicit, Ego quidem sum Pauli, ego Apollo, ego Cephæ, ego autem Christi.* *Divisus est Christus?* En tibi qui Ecclesiam in parteis distrahuut, CHRISTVM etiam ipsum, quantum in se est, discerpunt atque dilacerant. Ac ne quis forte putet hunc eundem in varijs coetibus, iisque ab vno illo corpore suo, quod Ecclesia est, alienis sedem habere, monet nos Dominus ipse, ne audiamus eos, qui dum nos in coetus illos ducere volunt, aiunt hic vel illic est CHRISTVS. Nolo hic asperius agere cum vlo, nec accusare quemquam; sed id tamen, quod in clarissima luce versatur, dissimulare non possum, nos Germanos, nos

inquam

inquit non minus, quam Corinthios schismate in partes Ecclesiæ, atq; Reipub. perniciosas diuulsos esse; nō minus dico: immo maioribus etiā de rebus, & ab eo tempore quo primū a veteri atq; catholica Ecclesia discessio facta est in natione nostra, ita quidē vsu venisse, vt vnū schisma semper ex alio nasceretur. Hinc tot cœtus hominū religionis caussa sociatorū apud nos, qui cum omnes veterē Ecclesiā infectentur, & sint qui huic adimere conentur auctoritatē Ecclesiæ verę, quā sibi vindicant singuli, non tamē multo minus acriter inter se, quam cū illa pugnant. Ac quoniā præter vnā hanc nulla alia societatū humanarū vera & Germana Ecclesia, in qua ad salutem aspirare queamus, esse potest: intelligitur haud obscure eos, qui de religione inter se hoc tempore contendūt, & patriā, & se etiā ipsos in graue periculi flāmam cōijcere. Qui dū mores aut dogmata aliorū, quibus cū in Ecclesia viuere debent, ferre nolint, idē eis accidit, quod ijs, qui in alto nauigāt, si quādo odio eorū quibus cū vehūtur incitati, aut nauē communē perforēt: aut vt ab his seiungātur, in mare profliant, seqūe fluctibus huius cōmittat. Hīc quid reliqua quæritis? an nō satius esset eis tolerare in nauī cōmuni, quod minus periculosū esset, q; haud dubie mortis periculo se offerre? Quāuis enim optadū esset, Ecclesia nec corruptelis vllis, nec vitijs deprauatā esse: tñ id quidquid est ijs, qui idē nec probāt, neq; imitantur, fraudi non est. At schisma omnibus, qui in eo versantur, perniciosum est, & nō minus Rép. quam Eccle-

siam ipsa labefactat. Itaq; ad eam curam incubere debemus omnes, vt positis simultatibus posthac cōcordes simus inter nos, & de religione Dei immortalis idē & sentiamus, & loquamur. Thrasibulus Atheniensis, vt ciuium suorum discordias sedaret, legem tulit, qua omnis illarum memoria obliuione perpetua deleatur; atq; hoc eius factum vno omnium bonorū ore laudatur. Quanto laudabilius foret, si nos, nos inquit Germani controuersias religionis sustolleremus ipsis; & iuriarias, quas nos ab alteris accepisse arbitramur, donaremus Ecclesiæ, donaremus patriæ, & non aliter, quam si inter nos nihil controuersiæ ynquam fuisset, quietis animis & concordi sensu inter nos viueremus. Quare in consilium adhibeamus non odium, nec arrogantiā, qui sunt pessimarum rerū consiliarij: sed caritatē, quæ ædificat & Ecclesiæ mirum in modū prodet. Hac eadē ducti certemus inter nos non vtri alteros vincamus contendendo, sed vtri de alteris melius mereamur. Cogitemus nos nō minus acres nostrorū, quam aliorū vitiorum iudices esse oportere, cum sua quenq; magis, q̄ aliena peccata premat, & eos qui alios condēnant, dū suis interea vitijs indulget, iure à Deo condēnari. Accusem⁹ ante nosipos, quam alios, si quo modo in bono vincere malū, & eos, qui nos hoc téporre oderunt, ad æquitatem Christianis hominibus dignam flectere possimus. Quod cum vtile fuerit per se, tum ad Ecclesiam repurgandam & pacem eius reconciliandā longe utilissimū, cum nec nos, qui sumus

cum

cū potestate Ecclesiastica, minus quām officiū nostrū postulat, fecerimus, nec qui se aduersarios cōstituerūt nobis, plus, quām recta & moderata ratio feret, fecerint. Nos igitur, nos, quos Deus in specula Ecclesiæ suę ita collocauit, vt Episcopi simus, excitem⁹ nos ipsos, vt non quę nostra, sed quæ Dñi nostri I E S V C H R I S T I & omniū sunt curemus; nec defendamus corruptelas atque vitia, sed eadem quoad eius fieri potest, tāquam vepres malas, extirpemus. Aduersarij autem nostri se quoque ipsos moderentur. Cogitent quām periculosa sit contentio omnis, vt quæ vim habet ad auditores peruerundos, auctore Apostolo. Cogitent quid acciderit Dionysio Alexadrino doctissimo patri, qui cum in refellenda hæresi Sabelliana egregiam operā Ecclesiæ nauasset: tamen cum cius animus in contentione exarsisset, nescio quo modo acrius, & concitatior esset, quām oporteret, a moderata veritatis ratione eò deflexit, vt non solum Sabellianam hæresim confutaret, quod bonum erat: sed etiam cōtrarium huic errorem inueheret, id quod non minus malum erat, quām hæresis ipsa Sabelliana. Nā ex eo errore nata fuit lues illa Arriana, quę postea totum fere Orbem terrenon sine graui Ecclesiæ atque religionis Christianæ pernicie peruagata fuit; vt Basilius ille Magnus recte factum Dionysij compararit facto eius, qui cum sureculum in horto curuum atque prauum flectendo corrigeret vellet, & in eo ipso esset nimius, & faceret, vt surculus idē in contrariam partem non minus curuus esset atque

deformis. Cogitent denique mutationes illas, quæ vel bona æque ac mala tollūt, vel pro malis alia nō minus mala inducunt, quales multæ in hæc tempora nostra inciderunt, minime ferendas esse. Quippe cum a bono Ecclesiæ statu tam alienæ sint, quām quæ alienissimæ: nec est, quā obrem hic metus infamie quemquam moueat, & ab eo, quod recta officij ratio præscribit, deterreat. Nam non, qui errorem suū agnoscit, & cōfitetur, cum in eo ipso voluntati diuinæ obediat, sed qui eundem aut nō agnoscit, aut defendit, perperam atq; turpiter facit. Aurelius Augustinus sanctissimus atque sapientissimus Episcopus cum in illa opinionū temporis sui varietate aliquoties lapsus fuisset, maluit errata hæc aperte cōfiteri, quām dissimulare eadem, aut defendere; nec eos, qui non satis cauti essent, in errorem vllum auctoritate sua induceret. Atq; hic etsi lucubrationibus suis doctrinæ Christianæ multū sanc lucis attulit, nec vllus Ecclesiasticorū scriptorū plura, & utiliora monumēta posteritati reliquit: ex omnibus tamē libris eius nullus est honorificentior ipsi, quām is, qui errores auctoris non dissimulāter aperit. Neque enim qui veritati cedit, succumbit turpiter: sed dū seipsum vincit, glorioſissima victoria potitur. Quæ cū ita sint omnia, ad eam officij nostri rationem omnes omnium partiū Germani excitemus nosipſos, vt sublato tādem schismate cōcors sit omniū de religione sensus; nec patiamur nos ab hac ratione vlo peruerso animi motu deduci. Et quāq; hæc, quę ad cōmunem nostrā vtilitatē

ac falu-

ac salutem vehemēter pertinēt, magnos animis omniū motus afferre debent: tamen si qui forte quieta consilia repudiauerint, maluerintq;e litigare, quām cōmu- ni cōsilio Ecclesiā atq; Rempub. iuuare, nos qui publi- cis Ecclesiæ muneribus fungimur, nos inquā, officium erga eandem atq; patriā nostrā pretermittere minime debemus: ne si forte hæc cū pernicie multorū conciderint, nos casum hūc præstare cogamur: & culpa no- stra non ita multo minus fraudi sit nobis, quām si ipsi admotis quasi machinis illas diruissemus. Quo magis elaborem⁹, vt si nō cū alijs, tamen seorsim Ecclesię cō- muni quasi incēdio cōflagrati, quantū in nobis est, suc curramus. Ad quā rem bene vtiliterq;e cōficiendā tan- to plus facultatis suppetit nobis, quāto minus ea om- nia Ecclesiæ nostrę desunt, quę ad eandē vel repurgan- dā vel excolendā sunt accōmodata. Habet hæc verbū Dei, & scripturas diuinitus inspiratas; habet illū san-ctorum Doctorū atq; Ecclesiæ Catholicæ de dogma- te veritatis sensum non obscurū, habet deniq; mores inueteratos, eosq; ab omnibus Ecclesijs approbatos. Ac si quid fortè horū alij cōetus habēt, id totū ab illo nostro veteri, vnde orti fuerūt, initio, quasi per manus traditū acceperūt. Hæc ipsa si peruestigauerimus nos, erit in pcliui, vt de omnibus ijs, quæ religionis sacro- sancte sunt, sine errore iudicemus; ac vera a falsis, bona aut̄ a malis discernam⁹. Itaq; cū in nostra potestate sitū sit, vt si velimus Ecclesiā ipsi nostrā simul & repurga- re, & excolere possimus, cauendū est maxime, nē culpa officij

officij deserti nos post hac premat; néue illud Spiritus sancti in scripturis, *Vae pastoribus, qui pascunt seipso*s, nobis iure exprobari possit. Suscipiamus igitur animos dignos munere nostro; corrigamus ante nostra, quām aliena vitia; atque operam demus, vt nec prauis atque peruersis moribus, nec vlli pernicioſo errori locus in Ecclesijs nostris relinquatur. Sed omnia ad gloriam Domini nostri I E S U C H R I S T I & salutem hominum ita referātur, vt in Ecclesijs eisdem vigeat pie-tas, vigeat disciplina, vigeat concordia. Hunc certe conatum nostrum, cumq; pie suceptum, Deus, qui consilijs quietis atq; salutaribus fauet, haud dubie approbabit; eiq; talem, tanquam bonū euētum adiunget, vt non solū amicis nostris atq; socijs satisfacere, iēd etiam aduersarios nostros placare possimus.

Quanquam autem si schisma illud sublatum fuerit, in posterum non solū Ecclesiæ, sed etiā Reipub. statutus melior erit procul dubio, tamen ne quid eorū, que ad institutum nostrum pertinent, pr̄termittam, ciui-lem etiam rationem, qua Respublica nostra fulciatur, subiungam. Ac primo quidem ostendam, quo modo remota corruptela morum disciplina vetus, eaq; ho-nesta, restitui tandem possit. Quod tanto fuerit neces-sarium magis, quanto minus, que nō bene morata est Respub. bona, tranquilla, atque beata esse potest. De-inde de pace ipsa atque concordia Germaniæ nostræ afferam, quæ mihi videbuntur ad rem pertinere. Ad extreum, quo pacto Respub. nostra non solū refi-

ei, sed etiam ornari atque amplificari possit, docebo.

Atque ut mihi quidem videtur, eadem Repub. optime constituta esse, in qua ciues faciūt sua sponte, quod bonum est, & cum officio recto coniunctum. Etsi igitur Plato ille philosophorum facile Princeps leges, quæ supplicia in sceleratos constituunt, probat: his tamen eas, quæ homines ad virtutem adducunt, & ita formant, ut præmio potius quam pœna digni sint, anteponit. Eset quidem optandum, ut patria nostra hoc tantum legum genus, quo regeretur, desideraret. Quod sane contingere, si homines nostri caritate atq; Spiritu sancto tantum ducerentur; sed quia cum imperfectioribus, quorū multi metu continendi sunt in officio, viuitur, certe ut bonorum virtus alēda est præmijs, ita improbi a scelere pœnis propositis sunt deterrendi. Neque enim ignotum est illud Solonis, *Duabus rebus, præmio & pœna Repub. contineri.* Sit igitur in Repub. nostra constitutum: Ut qui leges publicas violant adulteri, sacrilegi, calumniatores, perfidi, latrones, seditiosi, pditores, perduelles, nō solū omni honoris aditu intercludantur, sed etiam eo, quem forte obtinent honoratiorem, loco moueantur. Nec moueātur solū loco eodem, sed ex ipso etiā hominū cœtu prorsus eiiciātur: homines non digni, qui cū hominibus viuāt, ipsis nimirū ab omni hominū societate tam alieni. Rursus qui Reipub. vtilem nauant operam, hi ornentur præmijs; & in eo honoris gradu collocētur, vt quanto meliores sunt ciues, tanto beatius viuant, &

DE REPUBLICA

vberiorem virtutis suę fructū consequantur. Atq; hęc
præclara, quæ Imperator noster in Rempub. inducere
potest, idq; approbantibus bonis omnibus, procul du-
bio egregiā afferēt vtilitatem rebus nostris; & id plane
efficiēt, nihil vt videatur in Germania nostra miserius
esse, quām turpiter viuere, & patrię nocere; & nihil vi-
cissim beatius, quām bene honesteq; viuere, & de eadē
patria bene mereri. Quā rationē cū olim in Repub. La-
cedemoniorū cōstituēda sibi pposuisset Lycurgus ho-
mo prudētissimus, id quidē effecit, vt quos hęc genuis-
set ciues, vtiles essent patriæ; & mallent honeste mori,
quām turpiter viuere. Ex hac igitur multo plures, q
ex vlla alia Greciæ ciuitate boni atq; fortes ciues pro-
dierūt. Quo melius fecerimus nos, si hos: si hos dico?
immo si patres atq; maiores nostros, q honestatis ma-
gnam semper rationem habuerūt, & nō multo minus
bonis legibus, quām illa Lycurgi fuit, seipsoſ deuinxe-
runt, imitati fuerimus. Ac si vlli, certe nobiles nostri
atq; Principes viri, qui in oculis hominū viuūt, & alijs
vel bono, vel malo sunt exéplo, ad omnes recti officij
partes excitādi sunt. Quib⁹ nō solūm fraudi sit cōtra,
quām leges publicæ præscribūt, facere: sed etiā animū
ac mores non ita excolere, vt Reipub. vſui esse possint.
Nā q hoc officiū suū negligūt, non solūm perperā fa-
cere, verū etiā Rempub. cuius cōmodis seruire & con-
ſulere debent, prodere quodam modo vidētur, vt scri-
ptū est ab Xenophonte homine doctissimo. Huc ac-
cedat censura illa, cuius a me ante mentio facta est, vt
quo

quo quisque maiore ornatus est dignitate, eo grauiore infamiæ genere notetur, si forte in flagitia inciderit. Atq; hoc præclarū disciplinæ vinculū vtinā aut nunquā e Repub. nostra sublatū fuisset, aut primo quoq; tēpore restitueretur. Quod ipsum nobiles atq; Principes viri si dignitatē suā tāti faciunt, quāti facere debent, ita ipsi renouēt, vt sceleratos ordine suo moueāt; nec patiātur horū quasi contagione alios, qui ordinis sui sunt, cōtra quām decus commune postulat, infici atq; contaminari. Iā vero vt non solū scelerati metu pœnē terreātur, sed honorū etiā virtus præmijs acuat: certe bene meriti de Repub. in publicis cōuētibus ornētur, & extēt præclara quedā in Repub. nostra insignia virtutū. Quod quantam vim habeat nō solū ad homines in officio cōtinendos, sed etiā ad excitandas horū virtutes & actiones laudabiles, multa omniū ætatū exēpla illustria ostendūt. Atq; hæc, quæ de præmio & pœna a nobis posita sunt, non in eas angustias concludimus, vt ad nobiles & Principes viros tantū pertineant: sed tā late ea patere volumus, vt vniuersus populus prēmio inuitetur ad virtutē, recteq; facta, & pœna a delictis atq; flagitijs deterreatur. Sit igitur Res pub. nostra ita cōstituta: vt in hac posthac bonis vtile sit, atq; honorificū viuere honeste & patriam itiuare; sceleratis aut̄ calamitosum, malefacere ac patrię noce- re. Cogitemus quantum virtus maiorum nostrorum ipsis atq; Germanię nostrę existimationis bonæ pepe- rerit. Qua nimirum virtute illi ita se exteris genti-

bus commendauerunt, vt cum quædam harum ciuitates constituere vellent, euocarint homines nostros, eosque gubernaculis illaru admouerint. Hos nanque tanti fecerunt, vt ab eis regi ducerent beatu esse; neqs id iniuria. Nam in quibus ipsi & Pannonu, & Sarmatarum, & Transiluanoru ciuitatibus domicilia sua collocarunt, has ita administrarunt, vt præ ceteris earundem regionum ciuitatibus florerent. Quod si maiorum nostrorum mores boni tantum profuerunt exteris gentibus, quanto maius erit nunc dedecus nostrum, si ob vitia, nescio quæ, non modò non exteris amplius, sed ne nostris quidem profuerimus. Cum præ fertim eius rei, qua patriam iuuare possimus, cōficiendæ non ita difficilis sit ratio, dum modò & nostra, & maiorum nostrorum instituta bona, quæ partim moribus inueteratis, partim vero decretis cōuentuu nostrorum publicis continentur, custodire, quàm rebus nouis, & ijs quidem noxijs, studere maluerimus. Sed hæc haetenus de moribus hominu nostroru; nūc vero de pace atque tranquillitate. Constat discordiæ & factiones esse grauiissimas illas Rerumpub. pestes, quibus res magnæ non minus atteruntur, quàm concordia & coniunctione ciuium paruæ crescunt. Nam ille quamdiu in ciuitatibus atque Rebuspublicis versantur, tadiu hæc ita agitantur, vt sint prorsus miseræ. Dedit huius quidem rei documentuu Respub. nationis nostræ ante quàm constitueretur, & in vnu quasi corpus coalesceret. Quæ postea pro ea, quæ contrarijs attributa est, vi, tanto

tanto magis in concordi suo statu effloruit, quanto ante calamitosior fuerat. Et quamquam si schisma, de quo iam egimus, ex Ecclesia tolleretur, omnia nobis ad pacem atque concordiam essent faciliora: tamen si qui forte cupiditatibus suis indulgere, quamquam prijs atque quietis consilijs parere maluerint, ratio certe ineunda erit, ut si non caritate, metu tamen poenae ad officium reuocentur. Nihil aequum discordiam atque factiones alit, ac vis atque iniuria: dum qui aut pari sunt potentia inter se certant, aut potentiores eos qui imbecilliores sunt conatur opprimere; hi autem se atque fortunas suas opibus aliorum tueri student. Quo magis cauendum est, ne leges, quas maiores nostri de pace publica tulerunt, antiquentur; neve locus in Repub. nostra sit ijs, qui malum vi agere, quam legibus: homines non digni, qui cum hominibus vivant, quando ad ipsam belluarum immanitatem ita se abieciunt. Vigeat igitur iudicium illud, quod primus Maximilianus Cæsar ita consti-
tuit, ut in eo non minus facile ius suum infimi obtineat, quam summi; & hi si in leges publicas inciderint, non minore severitate, quam illi plectantur. Vigeant leges publicae, & summos atque infimos aequum teneant; id quod ad concordem Reipub. statum tanto erit appetius, quanto contrarium eius caussam dat maiorem odio, maleficijs, motibus. Ac quo maius Reip. nostræ sit praesidium in legibus, ac iure contra factiones, seditionesque, caueatur iterum ne cui hominum nostrorum liceat aut suo, aut alieno nomine in Germania militare.

scribere, nisi huius rei Imperator ipse auctor fact^o fuerit, aut fortè ei, qui militem scribit defensionis caussa, bellum sit gerendum. Ac quoniam callidi homines vim, quam alteris inferunt, sub specie defensionis excusare solent, intra quos fines ihs huius consistere debet, decernēdum videtur; nec minor in eos, qui Legi de pace fraudem faciunt, quàm in eos, qui hanc eadem non dissimulanter violant, pœna sit constituta. Ac quia leges inanes fuerint, nisi sint qui, quod præscribunt eadem, exequantur, renouetur illa Reip. nostræ sanctio, vt quicunq; possunt iniuriam ab ijs, quibus vis publica infertur, depellant & turbulentos coérceant; & si moniti officium hoc suum non fecerint, non multo lenius, quàm ij qui pacē turbant, multentur; quippe cum non minor sit culpa eius, qui nō ab alijs iniuriam propulsat, cum potest, quàm qui eadē infert. Iam quia priuata quorundam fœdera, eaq; ita contra omnes icta, vt ne Imperatorem quidem exciperent, factiones fouerunt antehac perniciosas: & mores nostros ita peruerterūt, vt cum ante seditioni communii omnium nostrūm consilio, atq; ope coércerentur, per fœderatos illos aliquandiu steterit, quo minus idē effici posset. Quo ipso quantum detrimenti Resp nostra ceperit, huius quasi vulnera declarat, & ante oculos omnium ponunt. Itaq; Lex illa Maximiliani, que, vt ante a nobis dictum est, vetat, ne qui fœderibus hujusmodi vel cum hominibus nostris, vel cum exterarum gétium Regibus se vlo tempore iungant, renouanda

uanda est. Renouandum est item illud saluberrimum Legis de pace publica caput, quod constituit, ut cōmu ni omnium ordinum ope arma e manibus seditiosorum extorqueantur; & eò quidem maiore cum feueritate, quòd quidam eorum, quos minime oportet, & milites nostri in ista Reipub. nostræ quasi nocte diurna assueuerunt populari patriam, ex huius præda sibi rem parare, & in ista sua armorum licentia spem libertatis, nescio cuius, ponere. Viuimus cum hominibus bellorū appetentibus, quos nisi pietas Christiana ad mansuetudinem flectat, malunt potius rem ad arma deducere, quām æquo cū alijs iure viuere. Quo etiam minus illi, qui sine iusta vllius auctoritate sunt militum concursus, ferendi sunt; eò quòd & nationi nostræ infesti sunt, & magnis motibus caussam præbere videntur. Solent quidem e malis moribus bonæ leges nasci, atq; hætū ferri solent, cum laboratur maxime, verum nobis, vt pestes illas, quæ Rép. nostrā per-turbant, tollere, atq; eam in statū, vnde decidit, quietum atq; concordē restituere possimus, non est necesse nouas ferre leges, sed quas habemus veteres retinere, tueri, custodire. Ad quod ipsum tāto nos magis excitare debet officium nostrū, quanto turpius atq; miseriis fuerit nos vel hanc labefactare, vel deserere, & in ea nobis ipsis tantum periculorum conflare. Quo ad cōcordes fuimus, virtus, atq; arma nostra præsidio fuerunt cum singulis nobis, tum Reipub. cunctæ & hostibus nostris terrori, sed nunc sublata concordia
atque

atque benevolentia, nec nobis atque patriæ hoc eius
asperrimo tempore opē ferimus, nec, vt ante, terrori su-
mus malevolis, sed ludibrio: dū putant se artibus suis,
quod conantur, efficere posse, nimirum vt nostris con-
filijs, nostris armis confecti, fractiq; concidamus. Nec
est, cur hic quæratis reliqua; cum vobis ignotæ nō sint
plagæ illæ, quas dum hominibus, nescio quibus, ijsq;
de nobis male cogitantibus, gratificamur, non ita pri-
dem accepimus. An non hac lege nati sumus, vt ma-
gnam nostri partem patria sibi vindicet? At nunc sunt
in Germania nostra, qui malint vim atque manum
patriæ huic suæ afferre, quām exterarum gētium vim
atque iniuriam ab ea depellere. Hoc malum, vt fuge-
re, & maculam hanc atq; dedecus, quod certorum ho-
minum culpa contraxit, e nomine nostro, quām pri-
mū delere possimus, nihil hic aliud dicam ego, quām
quod a nobis omnibus salus publica impetrare de-
bet; vt quas gerimus similitates inter nos, deponamus
quām primum; & posthac singulari animorum con-
fessione resistamus factiosis illis, & patrię laborati suc-
curramus. In ea incidimus tempora, vt hostem post
homines natos potentissimum truculentissimūmq; a
ceruicibus nostris non sine graue periculo nostro ar-
cere queamus; etiam si coniunxerimus omnes copias
nostras, & communem patriæ nostræ defensionē gna-
uiter susceperimus. Itaq; nisi desierimus factiones ipsi
nostras fouere, & nobis ipsi infesti esse, quid tandem
futurum erit nobis? ac si studio partiū incitati ijs, qui
e ruinis

e ruinis nostris crescere cupiunt, obsequi, quām idem
 de Repub. nostra sentire, cām q; iuncta opera tueri ma-
 luerimus, an nō hanc magna cum infamia nostra de-
 serere, deserere dico? immo prodere videbimur. Qua-
 re si nobis patria, si salus publica cara est, vt debet, ad
 eam curām incumbe nos oportet, vt quacunque ra-
 tione possimus omnia, quæ discordiē atq; factōnibus
 materiam subiiciunt, e Repub. nostra primo quoque
 tempore tollamus; & communi Ordinū sumptu ta-
 le in ea præsidium collocemus, vt coerceri facile pos-
 fint, qui leges vi atq; armis perrumpunt: nec æquo cū
 popularibus suis iure viuere volunt. Ac si qui fortasse
 a quietis consilijs abhorrebat, & discordia magis quām
 pace delegerentur, nec velint de suo suppeditare, vn-
 de præsidium illud alatur: inueniuntur tamen non
 pauci omnium Ordinū viri boni, qui quanto magis
 otio atque publicis rationib; nostris fauent, tanto
 minus consilia factōrum ferenda putant; hi certe
 nec patriæ, nec sibi deerunt, sed quantum debebunt,
 conferent in eam rationem, vt præsidium, quo de agi-
 mus, pernicioſis certorum hominum conatibus oppo-
 ni possit. Ac si leges apud nos tantum valuerint, quā-
 tum debebunt, & fuerint, quæ defendant innocentēs,
 seditionis autem comprimat, habebimus breui Rem-
 pub. quietam ac tranquillam; & factiosi legibus ac ar-
 mis bonorum territi consilia sua, eaque Reipub. perni-
 ciosa, mutare cogentur. Sed de ijs, quæ ad cōcordiam,
 & pacem publicam pertinent, satis iam dictum sit; si

I quod

quod vnum addendum est, non prætermisero, nimirum rem pessimi exempli non ita pridem in Germaniam nostram inductam esse, vt leuissimis quibusq; nebulonibus liceat bonorum virorum nomina non solùm sermonibus, sed etiam scriptis conscindere; &c, quorum constantia, virtus, & fides erga Imperatorem nostrum atq; Rép. perspecta est, & quasi in illustri loco sita, eos acerbissime calumniari; commendare auté in vulgus seditiosos, vt quantum in eis est iam non tam fraudi sit malis perperam faceré, quam bonis in officio permanere. Quod quanto minus ferendum est, tanto maiore seueritate in auctores facinoris tantum, eorumque fautores statuendum esse videtur. Verum quia ea, quæ Reipub. intersunt, constitui non facile possunt, nisi Princeps noster auctoritatem potestatemq; iustum recuperarit: de hac ipsa, quod me postremo loco facturum ostendi, nunc dicam, atque hanc Orationem eo libentius ingrediar, quòd ea se nobis offerunt, vt non solùm potestas illa recuperari facile, sed per eam patria nostra ornari, & Imperium feliciter sane propagari possit. Et quoniam quæ afferam ego cum salute patriæ atque vniuersi Orbis Christiani coniuncta erunt, spero rem ipsam a vobis impetraturam esse, vt Orationem hanc meam non inuiti sitis audituri. Ac primo quidem si concors atque quieta esset Respub. nostra, nec exteræ nationes tot ac tanta pericula nobis atque vniuerso nomini Christiano conflarent, minus esset causæ, cur

sæ, cur in Repub. nostra maiorem Imperatoris potestatem desideraremus. Sed quia in eadem viuunt homines quidam factiosi, & tales, vt nisi potestate aliqua maiore a consilijs perniciosis deterreantur, nec le gibus obedient, nec patriam perturbare desinant: & cum Turce, ac quidam vicini nostri id agant, vt Imperium nationis nostræ, quod idem Romanum est, aut transferatur aliò, aut funditus intereat, & nos non solum hoc insigne ornamentum nostrum, sed etiam libertatem amittamus: certe alterutrum horū euenire necesse est, vt vel Imperatori nostro maior potestas adiungatur, vel Respub. nostra intestinis motibus & exterarum gentium armis confecta ipsa pereat. Hoc si accidet (quod tamen omen Deus perbenigne auerat) non ita multo post reliquæ etiam Christianæ gentes ruerent. Est enim Germania nostra illa quasi arx, in qua Orbi Christiano & opportunitate loci, & militum copia atque fortitudine tantum est præsidij, quantum in nulla alia natione. Nam cum Imperium in ea sedem suam quasi in medio Christianarum gentium posuerit, & vicina sit Italiæ, Galliæ, Pannoniæ, Sarmatiæ: certe in quamcunq; harum nationū hostes Christiani nominis impetum fecerint, noster ei miles subuenire subito atq; commode potest. Quod quato nationib' illis pl' auxiliij ferre potest, tanto plus piculorū eisdē esset, si hostes illi Germania nostra potirētur. Nisi quis forte putat hos eosdē cupiditates suas crudelis nostro sanguine ita expleturos esse, vt tela ipsorum

postea sint quietura. Hoc qui sentit, eos non satis bene nouit; & ignorat Mahumeticis legibus ita vinciri, vt si parcant vlli Christianæ genti, graui se religione obstringi arbitrentur. Verum illud tamen negandum non est eos hoc tempore nostrū plus, quàm aliorum sanguinem sitire; non quod nobis oppressis depositari sint arma, sed vt eisdē sanguine nostro imbutis sperrent fore, vt reliquas Christianas nationes facilius vin cere atq; opprimere possint. Quare nō solūm nostra, sed etiam omnium Christianorum interest Imperatoris nostri potestatem, atque adeo Imperium ita constitui, vt vigeat, & pristinam suam dignitatem recupere. In quo nos quidem tenuiore etsi aliquandiu satis bene beatęq; viuere potuimus, non tamen in nobis Orbi Christiano tantum fuit præsidij, quantum esse debuit, & dignitas Imperij nostri postulauit; aliās Turcæ Bizantium non eripuissent Reipub. Christianę, nec fines suos eò protulissent, vt iā e Pannonia, cuius bonam partem occuparunt, ceruicibus nostris immine re videantur. Fuit antehac nobis atq; cunctæ Europæ perhonorificum cum istis in Asia ipsa bella gerere, & faucibus horum exterias gentes eripere. At nūc (prō Deus immortalis) res nostræ eò reciderunt, vt nō in Asia amplius, sed in finibus nostris cum eisdem pugnare cogamur. Quo magis potestati Principis nostri, atque adeo Imperio fauere ipsi, & operam dare debemus, vt eodem nostræ atq; Christiani Orbis res contra communes hostes bene muniantur. Imperia quæ

vi constat, & populos duriore seruitute premunt, minime probο; illa autem moderata, quæ populos liberos non affligunt, sed defendunt: nec eosdem opprimunt, sed in officio tamen continent, & ab intestinis motibus auertunt, non possum non probare. Maxime si ita ferant tempora, vt necesse sit horum potentia iusta aliorū vim iniustum & crudelem frangi. Ut enim iniustum Imperium, quod seruitute homines opprimit, perhorrescendum est, ita bonum atque iustum, quod liberate eosdem atq; defendit, expetendum. Inciderant in illud Iudæi, cum ab Assyrijs capti seruitutis durissimæ vinculis constringerentur: sed postea tamen Cyrus, quem Deus ipse excitarat Imperatorem iustum, iugum hoc a ceruicibus illorum deiecit. Quo tempore animaduersum fuit imperia iusta & approbari diuinitus, & hominum generi multum conducere. Quare nolim in natione nostra Imperium tale, quale & Assyriorum fuit, & hoc tempore Turcarum est, existere. Maxime tamen volo tale Imperium, quale priscis temporibus Cyri, & postea Caroli, Othonū, Henricorum, & Federicorum nostrorum fuit, restitui. Nolo nos Germanos, nos inquam, per quos alij liberi esse debet, libertatem nostram pristinam amittere. Sumus profecto, sumus in eum locum deducti, vt statuendum sit nobis vtrum hoc tempore, quo tantis procellis astamur, malimus scrivere turpiter, aut perire, an Principem nostrum maiore, & ea cum potestate esse, vt maximorū periclorū metu nos liberare, atq; dignitatem nostram

nostram tueri aut instaurare recte poscit. Ad quod ipsum ante etiam nobis oportunitates quædam bonaæ fuerūt, sed tamen nec maiores nec meliores, quàm hoc tempore; vt si quod necessarium est rebus nostris, & tantum commodorum afferre potest, neglexerimus, ipsi a nostra atque publica Germaniæ nostræ salute simus plane auersi. Principio constat Imperatorem nostrum e publico Reipub. nostra non habere, vnde ipse ac familia eius commode viuere possit; Abundare autem singularum regionum nostrarum Principes, atq; Magistratus: ad eosq; tantum bonorum, atque fortunarum fluere, vt non solùm commode, sed etiam laute atq; cum quodā splendore viuere queāt. Quod quale sit, & quantū de Imperatoris existimatione atque auctoritate detrahatur, non facile dixerim; certe alterutrum horum vsu venire necesse est, vt aut Imperator noster ab ijs, qui in potestate ipsius esse debent, contemnatur, vt nunc tempora sunt, & mores: aut damna hæc Imperij patrimonio suo, si quod habet, vberius quoquo modo sarciat. Quorum alterum non potest non nocere Reipub. alterum vero eidem tanto minus commodum est, quanto diligentius ea, vnde multum emolumétorum ad nos reddit, quàm tenuia, si quæ habemus, curare solemus. Quare vt Imperator noster e publico nostro tantum utilitatis atque emolumentorum capere possit, quantum oportet, si suaderem Principibus Magistratibusquæ eiusdem Reipub. nostre, vt quæ vectigalia publica Imperij

perij ad se transfulerunt maiores ipsorum, ea restituerent, atque ita censum Principis sui ad communem omnium utilitatem augerent, non esset profecto, cur quisquam consilium hoc meum reprehendere deberet. Etenim si Longobardorum Principes cum primum regnum suum constituerent, de suo, quod publici iuris nullo tempore fuerat, in publicum tantum contulerunt, ut Rex eorum censem honestum habere posset: quanto aequius esset, ut nos Imperatori nostro redderemus, quae maiores eius aliquando habuerunt? Sed quia verisimile non est Principes, Magistratusque nostros a iure inueterato spote sua decessuros esse, & passuros, ut res tanti emolumenti a se auferantur, ne detur causa motibus periculosis: satius esse ceseo institui vectigalia noua ad utilitatem Imperatoris nostri, quam vetera restitui. Cum praesertim populis non aequa graue fuerit pendere vectigal nouum, quam Principibus atque Magistratibus sua, quae multum utilitatis afferrunt, vectigalia amittere. Ac mihi quidem videtur populis, atque adeo cunctae Germaniae vectigal illud eo minus molestum futurum esse, quod singulorum rationes publicis commodis ita contineri videntur: ut quanto Imperator noster plus poterit, tanto singuli Reipub. nostrę ciues & quietius viuere, & e bonis eiusdem facilius crescere queant. Nam quoad Imperium nostrum beatum fuit, & Imperatorum facultates amplae, maioribus nostris aditus ad magnas cum diutinas, tum dignitates non solum domi, sed etiam in

Prouin-

Prouincijs nostris patuit. Hinc in Italia Gonzagarū, Vicecomitum, Scaligerorum, Columnensium, Malatestarum, & aliarum nobiliissimarum gētium fortunæ atq; ornamēta. In Gallia autem Sabaudiæ, Salutię atq; Montisferratensium Principum opes atq; dignitates magnæ atque florentes. Quas ipsas gentes e Germania nostra in illas sedes transtulerunt Imperatores nostri, & censu atq; honoribus auxerunt. Quanto igitur ad utilitatem etiam singulorum aptius fuerit in Repub. nostra virtuti bonorum talia proposita esse præmia, quam eosdem e tenuitate Principis sui ita languere, ut in ipsa etiam patria non modò non amplas illas bonorum accelsiones exspectare quisquam, sed suā ægre tueri possit. Errat igitur quicunque putat fore, ut quod Imperatori soluet vectigal perditurus sit, & non potius bene, atque utiliter omnino collocatus. Verum enim uero cum Reipub. nostræ intersit plurimum, ut non modò Princeps eius non tenuior sit, quam oportet, sed aliâs etiam tantum possit, quantum dignitas eius postulat: certe quod sibi Magistratus in natione nostra atque Principes singularū regionū sumunt, ut populis suis quoties volunt arma imperent, idem cur Imperatori publico nomine, & totius Reipub. caufsa non liceat, equidem non video. Ac si illis licet imperare militem, etiā si Imperator auctor nō fiat: quanto equius fuerit, Imperatorem sine consensu horum euocare ex omnibus Germaniæ regionibus milites, quotiescunq; vel motus intestini sedandi sunt, vel

externi

externi hostes arcendi. Quod cum nunc ei non liceat, nisi antè, quod agere instituit, Ordines Reipub. nostrę ratum habuerint, fit, more nescio quo, ut qui Principi nostro parere debent, eorum ipse nutum intueri cogatur. Quod quale omnino sit, malo vos tacitos cogitare, quām ipse durius quidquam proferre. Incommode dum certe hoc esse Reipub. nostræ quotus quisq; est, qui non intelligit? Nam cum ad res bene gerendas sæpe opus sit celeritate, quam Iulio Cæsari primio Imperatori multas atque glorioſissimas peperisse victorias memorię proditum est, cum primis vtile erit Reipub. Imperatorem tantum in ea posse, vt sine vlla mora huic eidem succurrere valeat; nec ipsi neceſſe sit tempus terere eo impetrando, quod publica ſalus exigit, auxilio; atq; ita ſæpe occasionem rei bene gerendæ amittere. Ac ſi vñquam antehac ratio illa fuit necessaria patriæ nostræ, certe hoc tempore necessaria eſt maxime: dum quidam eorum, qui in consilium publicum adhibentur, maiorem ſui priuati quām publici commodi rationem habere ſolent; nec ante probant, quod Imperator petit, quām eis rerum nescio quarum, nec ſatis bonarum atq; Reipub. vtilium, licentiam confeſſerit. O tempora! Ad quam peruersitatem hoc etiam accedit, quod cum in milites nostros ij, qui ſingulis populis præſunt, Principes atque Magistratus plus quām Imperator ipſe potestatis habere videantur, ijdem milites auctoritatem huius Principis ſui iuſtam contemnant; nec dubitent contra

hunc arma suscipere & patriæ manus nefarias afferre. O mores! olim cum disciplina vetus vigeret, qui in militiam peregrinam proficiscebantur homines nostri, semper Imperatorem atque ipsum adeo Imperium patriæ nostræ in sacramento militari excipiebant. Sed nunc in ista rerum nostrarum perturbatione inuenias multos, qui nec Imperatoris, nec patriæ villam habeant rationem; & quorum arma non minus infesta sint Cæsari nostro atque Reipub. quam exteris gentibus, ijsque a nobis prorsus alienis. Quod malum nisi e Repub. nostra sublatū fuerit quam primum, periculum est, ne ipsi nos atque patriam nostrā breui funditus euertamus. Quare si hanc beatam, & nos in ea beatos esse voluerimus, eò conferamus curam operamque nostram, ut maior sit in posterum Imperatoris nostri potestas: nec minus hic possit in cunctam Germaniam, quam singuli Principes in singulos populos suos. Quod si euenerit, certe quod nunc non sine magno nostro damno prostratum iacet, Imperium nostrum eriget se breui, & frustus Reipub. vtiles atque salutares tandem aliquando feret. Ac si quis fortè metuat, ne si potestas Imperatoris ita restituta fuerit, libertas nostra in dubium vocetur, is sic habeat Principem non terrori esse bonis, sed improbis atque sceleratis: nec eos, qui Magistratui suo tantum tribuunt, quantum debent, sed eos, qui iustum eius Imperium recusant contra, quam veræ libertatis ratio præscribit, facere: quando cùpiditati-

piditatibus suis improbis turpissime seruiunt, nec eam, quam debent, rationem salutis publicæ ducent. Fallitur enim, quicunque libertatem suam in eo constituit, ut quæ facere debet, non faciat. Cum præsertim ea demum vera sit libertas, quam Deus ipse præcordijs hominum inserit, ut non inuiti faciant, quod officium rectum præscribit: sed libenter & legibus bonis obedient, & Magistratus suos obseruent: & caueant, ne contumacia sua horum auctoritatem conuellant. Quod quatenus homines faciunt, eatenus seruitutem carnis turpem vitant, & voluntatem suam voluntati diuinæ plane vera cum libertate accommodant. Vellem equidem omnes officium suum præstarent volentes; sed si qui forte obiecto maioris potestatis metu cogendi sint, hoc per se multo erit melius, quam concedere ipsis, ut spreta summi Magistratus auctoritate faciant, quod sibi libet: idque certe non minus, quam equo feroci injicere frenum: quam permittere, ut effrenatus currat quoquaque impetu suo feratur. Quod cuiusmodi fit, & quam perniciosum dederunt documentum casus perhorrescendi, eorum qui cum Imperatorem nostrum, in cuius potestate esse debebant, contemnere non dubitarent, eodem, quod excitarant, belli incendio conflagrarunt ipsi atque considerūt. Sinite me hoc loco præterire reliqua, quæ sine acerbissimo animi dolore ne cogitare quidé possum. Et quanquam quæ de potestate Principis nostri dixi,

æqua sunt per se bona, & Reipub. necessaria, tamen ne cui sententia hæc mea durior esse videatur, eam ita moderor: vt velim potestatem imperandi, cogendi-que milites ita penes Imperatorem esse, vt tamen singulis Principibus Magistratibusq; ea, quam in singulos populos suos habent, potestas non adimatur; dum modò ijdem non pluris faciant suam priuatam quām publicam Principis sui potestatem, nec minus huic tribuant, quām sibi a populis suis tributum ve- lint. Nec tamen repugnarim, si numero militū, quem Imperator euocare possit, certus statuatur modus: vt nec minor sit, quām res postulet, nec maior, quām vt huic fine graui popolorum damno stipendia solui queant. Nolo item perpetuum esse, quod suadeo, ve- cīgal: sed nos hoc onere leuari, simulac Imperium nostrum accessione aliarum gentium atque vectigalibus peregrinis auctum fuerit. Arbitror nanque onus hoc sustinendum quidem esse, sed ad tempus tan- tūm; vt certiore atque maiore cum immunitate vi- uere tandem aliquando possimus. Interea vero Principes Magistratusq; nostri, si libertati Germaniæ nostræ ex animo fauent, cauebunt, ne ipsi tri- buto extra ordinem imperando populis suis durio- res sint, quām æquitas & libertas Germaniæ nostræ ferat: vt si priuatum ipsorum commodum publi- co, vt par est, cesserit, non sit, cur populi nostri se hac ratione non subleuare potius, quām opprimi existiment. Nam non modò non ab hominibus no-

stris plus quam ferre possint, exigetur: sed hi etiam
 e Republica bene constituta atque florente tantum
 emolumentorum capient, vt non facere iacturam,
 sed lucrari potius videantur. Recte igitur, ordine, atq;
 e Repub. nos facturos esse censeo, si protestatem Impe-
 ratoris nostri in eum locum restituerimus, vt siue vis
 publica in patria nostra suscepta, siue aliunde illata
 fuerit, militem omnibus Germaniae nostrae populis
 imperare, & prouidere possit, ne quid detrimenti pa-
 tria eiusq; Imperium capiat: & habeat e vestigalibus
 suis tantum, vnde non solum viuere commode, sed
 etiam militibus suis stipendia soluere possit. Speran-
 dum est, si haec quasi fundamenta salutis publicae ia-
 cta fuerint, fore, vt Imperium nostrum in eum, vnde
 decidit, locum atque statum bonum breui reducatur;
 & idem ornamentum nobis insigne, alijs autem Chri-
 stianis gentibus praesidium certum sit allaturum; idq;
 tanto magis, quanto nunc tenuitas Imperatoris rebus
 communibus plus nocere videtur. Ac si non dignitas
 nostra, si non patriae decus, si denique non officium
 summum, ipsa tamen necessitas nos adducere debe-
 ret, vt opes Imperatoris nostri ad auertendam maxi-
 mam a Repub. nostra pestem augeremus. Quippe cu
 exterarum gentium consilia perniciosa eò nos dedu-
 xerint, vt nisi Rempub. nostram ea, quam audiuitis,
 ratione primo quoq; tempore constituerimus, futurū
 sit, vt hac amissa in summas nos ipsi ærumnas incida-
 mus. Et quoniam non nostra solum, sed etiam totius

Orbis Christiani salus hoc tempore agitur, dum nos, in quorum virtute atque armis tantum præsidij est huic, periclitamur, certe quod ego hoc loco suadeo, id omnes omnium gentium viri boni haud dubie approbant. Qui tum demum se beatos fore arbitrabuntur, si vos, in quos oculos suos iam dudum coniiciat, viderint concordes esse: atq; singulari animorum confessione & Rempub. nostram tueri, & contra hostes Christiani nominis arma ferre. Quare tacita quasi voce sua nos rogare atq; obtestari videntur, ne nobis ipsis, ne patriæ nostræ, ne deniq; Orbi Christiano hoc eius asperrimo tempore desimus. Accedit huc oportunitatis tantum ad Rempub. nostram non solum reficiendam, sed etiam augendam atq; ornandam, vt meliorem, maiorémq; ne optare quidem possemus; hanc ipsam nisi arripuerimus aude, nos ipsos fugere, & officium rectum, quod patriæ tribuendum est, prorsus deserere videbimur. Etenim si sublatis e Repub. nostra factionibus idem senserimus, nobis profecto, atq; exteris nationibus multum spei bonæ afferetur: sed quanto plus afferetur, si maximæ Christianorum gentes födere certo, ac societate nobiscum coniunctæ fuerint? Talis quedam, tamq; bona gentiū earum coniunctio fuit, cum Carolus ille Magnus rebus nostris cum Imperio præcesset. Quo tempore Christianorum potētia iusta tantum terroris Saracenis, atq; alijs nationib' immanitate barbaris, atq; nomini Christiano infestis iniecit, vt præclare secum agi arbitrantur,

rentur, si non dico Christianis bellum inferre, sed sua
tueri, atque defendere possent. Quo minus cōmitten-
dum puto, vt eam, quæ hoc tempore se offert, occasio-
nem ad talem cum multis gentibus coniunctionem
amittamus, idq; non sine graui damno, atq; dedecore
nostro. Etenim dum nos inter nos simultates acres ge-
rimus, & aliæ Christianæ gentes scipias intestinis bel-
lis conficiunt, communes hostes nostri interea magis
culpa nostra, q̄ virtute sua ita creuerunt: vt hoc tem-
pore nobis, atq; toti Orbi Christiano ab eis periculū
summum impendere videatur. E quo ipso vt eripia-
mur, Deus pro clementia sua infinita summam rerum
nostrarum ad gentem Austriacam detulit: ad eam ni-
mirum gentem, per quam quantum tribuere vellet
Christianis gentibus declarauit; cum signum crucis ē
cœlo ostenderet tempore eo, cùm Rodolpho, qui pri-
mus ex ea familia Imperator creatus fuerat, Aquisgra-
ni more maiorum diadema imponeretur. Ostendeba-
tur iam tum spes bonis omnibus fore, vt imperatibus
Principibus Austriacis gentes Christianæ respirare tā-
dem, & metu hostiū crucis truculentissimorū libera-
ri possent. Quæ spes ne falleret vllum, & si Imperium
nostrum huic domui non tantum potentiae, quan-
tum dignitatis adiunxit, eandem tamen ita amplifi-
cauit, vt hoc tempore plus possit, quām omnes alij
Christiani Reges: etiam si omnem horum potentiam
in vnum conferas. Nam ab eo iam tempore, quo pri-
mum Austriaci Principes in scđe Imperij nostri col-
locati

locati fuerunt, mirum est quantum, quāq; magnis rebus aucti cumulatiq; fuerint: primū accessione Rhētorum, Valeriorum, Carnorum, tum Belgarum, deinde regnum Hispaniæ, Siciliæ, Neapolitani, tum Bohemiæ atq; Pannoniæ. Omitto hīc prudens Marcomannorum, Quadorum, Insubrum magnos populos. Hi populi, nationes, atq; regna quām late pateat per totam Europam, & quantū possint, quotus quisq; est qui nescit? Quæcum olim ab Imperio Romano diuellerentur, quo magis vires huius attenuatæ fuerūt, eo nunc magis eædē firmari atque muniri videntur: quando tot regnum, populorum atq; nationū potentia in ea domo, quæ cū Imperio rebus nostris præest, in vnum quodam modo coäluerit. Amisit tempibus illis Imperium nostrum, quod vi atque armis sibi olim pepererat. At nunc in ea, a qua regitur gēte, id quod tum vi extortum fuit, sine sanguine recuperare videtur. E quo ipso quanto minus aut militum virtus, aut hominum industria sibi vindicare potest, tanto maius diuinæ benignitatis, atque beneficentiaz lumen mentibus nostris affulget. Nam cum Imperiū Orbis terræ ab eo tempore, quo primum in natione nostra domicilium suum collocauit, & Christianum fuerit, & tale prorsus ut iniuriam non faceret alteris, sed ab eis propulsaret potius: dubitandū non est, quin huic Christianorū siue præsidio, siue patrocinio Deus antehac semper fauerit. Itaque etsi Respub. nostra sæpe in magna pericula adducta fuit, tamē eam Austria-
corum

corum Principum virtus iam diu feliciter sustentauit. Et, cum essent, qui genti huic inuiderent, omnesque neroos ad hanc oppugnandam intenderent, tantum tamen absuit ut eandem euertere possent, ut quanto id magis molirentur, tanto illa maiore & emolumen- torum, & ornamentorum accessione augeretur. Caro- lus Dux Burgundionum, Princeps fortis atq; bellico- sus, cùm imperante Frederico tertio Austriaco victri- ces legiones suas in Germaniam nostram duxisset, atque Nouesium obsidione premeret: Fredericus au- tem exercitum magnum atq; bellicosum ex omnibus Germaniæ populis comparasset, quo Carolus reijcere- tur, certe graue quoddam atque pericolosum belli in- cendium excitari videbatur. Verum Deus pro beni- gnitate sua eam felicitatem tribuit Imperatori opti- mo, ut non solùm bellum hoc sine sanguine dirimere tur: sed idem etiam cum eo, quem hostem habuerat acerrimum, affinitatem contraheret. Cuius quidé rei is fuit fructus, ut hereditas Caroli ad gentem Austria- cam non ita multo post deferretur. Accesserunt tum ad pristinas huius facultates Belgarum, atq; Sequa- norum populi diuites atque florentes: ut quod primò visum fuerat malo esse Frederico, id ei posterisq; ip- sius multum vtilitatis attulerit. Et quanquam inuidi quidam certos Belgarum populos concitauerant, ut contra Maximilianū Frederici filium se se commoue- rent: tamen & hi motus sane feliciter sedati fuerunt, & Belgium ita pacatum, ut huius populi ab eo iá tem-

pore erga Principes suos in fide nunquam vacillarint. Quid vero dicam de ea, qua idem Maximilianus affectus fuit iniuria, cum ei & sponsa & regio huius dotalis præriperetur? Veruntamen res ita tulit diuinitus, ut hoc eius damnum magno domus suæ commodo & quasi lucro sarciretur: cum Regnum Hispaniarum inclitum affinitatis iure veniret in potestate Philippi filij eius, veniret regnum Neapolitanum, veniret regnum Siciliæ. Ac cum nostra ætate fœderati quidam, ijqvé potentes Carolum Imperatorem à possessione Italiae deijcere vellent, & huic graue atque pericolosum bellum inferrent: eodem tempore Pannoniæ atque Bohemiæ regna Ferdinando fratri eius, qui rebus nostris cum Imperio nunc preest, aecrè uerunt; & nostrorum militum virtute territi hostes obsidionem, qua Mediolanum cinixerant, re infecta soluerunt. Iam cum proximis hisce annis quidā potentes consilia contra Carolum Imperatorem nostrum, ciusqvé filium Philippum nescio quæ & Austriacæ genti, & Germaniæ nostræ pernicioſa captarent: en tibi, eidem Philippo Britanniæ Regina atque heres nubit: &, quo beneficio suo Deus clarissimam, sanctissimamqvé feminam, eamqvé iniuria eorum, a quibus minime oportebat, oppressam ita extulerat, ut in excelsa dignitatis gradu collocaretur, hanc cum eodem Philippo ad perpetuam vitæ societatem coniunxit. Videmus iam, videmus Principes populiqvé Germani, Deum antehac Austriacam gentem confer-

conseruasse ac ornasse mirabiliter: & tantum bonorū atque potentiae iustae ad eam detulisse, vt si vlla, huius certe potentia res Christianas prope ruentes fulcire possit. Et quanquam in ijs cogitationibus quæ illam quietam rerum nostrarum rationem, procurationemque complectuntur, magna cum delectatione animi versor, nihilque opto magis quam vt cedem res sine sanguine & seruari & amplificari queant in perpetuum: tamen quia, vt nunc sunt tempora, optare id facilius, quam sperare possum. Certe vt maiore in modum lætore nationibus, populisque Christianorum tantas accessiones ad potentiam gentes illius eo iure, quod omnes gentes approbant, factas esse: ita nō possum non gaudere Imperatores Austriacos saepe signa dedisse fortitudinis cuiusdam excellentis, atque bella multa & gessisse ipsos feliciter, & confecisse, quoties vel Barbari domandi essent, vel alij hostes frangendi. Quibus sane profligatis & Insubres & Ligures, qui a nobis fuerant auilli, recuperavit idem Imperator noster Carolus. Regnum autem Tuneti, quod e manibus Turcae singulari virtute excusserat, Hispaniarum regno adiunxit; & eundem hostem in Pannonia ita terruit, vt armis nostris lacesitus pugnandi potestatem non faceret, sed subduceret se, ac trepidus pedem referret. Iam vero Ferdinandus, qui fratri optimo optimus Imperator successit, & hoc tempore summæ rerum nostrarum præst, quantum pietatis cum virtute summa coniunxit! Cuius

DE REPUBLICA

iustitia, prudentia, temperantia, vigilantia atque fortitudo in illustri quasi loco sitę omnibus bonis perspectae sunt, & vno omnium ore celebrantur. Qui nō solùm in rebus secundis fuit semper animo moderato, sed etiam in aduersis constanti atq; magno: vt fortunam, si quando iniquior esset sibi, vincere videretur. Qui cum alijs in rebus de nobis bene meritus est, tum quòd tam diu impetus Turcę potentissimi atq; truculentissimi hostis solus sustinuerit, eosq; a ceruicibus nostris depulerit, meritus est optime. Ac quia idem ille hoc agit perpetuo, in eoq; est plane totus, vt rebus nostris languentibus mederi possit: certe nihil æque optandum esse videtur, quam vt cunctus optimus optimi Principis consilijs tandem aliquando respondeat. De Philippo autem Caroli filio eodemq; Rege Hispaniarum quid dicam? Qui ita viuit, & sic se gerit, vt in eo paternę virtutis spem boni omnes collocent. Ad cuius liberalitatem, prudentiam, atq; iustitiam excellentem tantum fortitudinis specimen iam accessit, vt cum omnes gentes admirantur, & in oculis quodam modo ferant; hic cum non ita pridem Regem potētissimum vicisset, se tamen ipsum maiore cum gloria viciisse videtur: cùm victoria ea vteretur tam moderate, nihil vt sumeret sibi insolentius, sed omnia ad honorem Dei, vnde omne bonū proficiuntur, more maiorum suorum referret. Tali pietate qui prædicti sunt, hos Deus fouere, & ad eos plus, quam ipsi optant, deferre consuevit. Maximilianus autem

Ferdi-

Ferdinandi Imperatoris filius & Bohemorū Rex, cùm
 absēte Carolo Imperatore Hispanias regeret iuuenis,
 quām illustria virtutis signa dedit? q̄ bene gessit om-
 nia? vt gentium illarum voluntates sibi conciliauit? In
 rebus autem Pannonicis non minor eius virtus elu-
 xit. Nec Ferdinandum eius fratrem præterire hic pos-
 sum. Qui & regnum Bohemiæ singulari prudētia ad-
 ministrat; & vbi superiori anno exercitum in Panno-
 niā contra hostes Christiani nominis bellicosissi-
 mos duxerat, eum existimationis bonæ fructum ce-
 pit, vt ei neque consilium neque fortitudo ad res opti-
 me gerēdas deesse videretur. Porro Carolus Ferdinan-
 di Imperatoris filius, qui etsi minimus natu est inter
 fratres, non tamen in eo minorem virtutis spem boni
 omnes ponunt. Quippe cum eiusmodi, tamq̄ue excel-
 lētis sit indolis, vt ad res maximas natus esse videatur.
 Ex his omnibus constat gentem Austriacam tantūm
 & potentia & virtute hoc tempore excellere, vt ad Im-
 perium Orbis terræ, & summum decus genita esse, &
 Deus per hanc, quam tantopere auxit, rebus nostris
 fessis atque afflictis nunc tandem succurrere velle vi-
 deatur. Ac cum singula Christianorum regna vim at-
 que impetus Turcarum ægre sustinere possint, nec Re-
 ges illorum inter se ita iuncti sint, vt alius alij opem
 ferat: est profecto quamobrem Deo immortali ma-
 gnas gratias agamus, quod hisce difficillimis tempo-
 ribus nostris ad gentem illam, quęcum Imperio Ger-
 maniæ nostræ præst, tantum potentia atque iusti-

DE REPUBLICA

Imperij detulerit, vt Turcarum potētia recte atq; vtiliter opponi possit. Etenim si omnes nationes atq; populi, qui in potestate sunt Imperatoris nostri, & Philosophi Hispaniarū Regis cum ijs, quibus Turca in Europa, Asia, & Africa imperat, gentibus contuleris, vt hęc vincant hominum numero, illæ tamen & virtute militum, & armorum genere his eisdem lōgo interuallo antecellere videntur; nisi quis forte putat Germanos nostros, Italos, Hispanos, Pannones, Bohemos, Belgas cedere Asiatico, quo Turca potissimum abundat, militi: & naturā eos, qui Septentriones spectat, non magis ad fortitudinem animorum, corporumq; robur finxisse, quam illos, qui sub cælo viuunt calidore. Et quanquam copias quasdam nostras Turcæ aliquoties afflixerunt, eas tamen victorias nec incruetas, nec sua magis virtute, quam nostra culpa ipsis partas fuisse, præclare intelligimus. Quippe cum paruę manus militum nostrorum maximis atq; robustissimis horum legionibus et tirones veteranis obijceretur: vt si nulla alia culpa in nobis hæsisset, temeritatis tamen iure damnare naremur. Volo equidem nos primo omnium ad Deum confugere supplices, & nos totos benignitati eius credere atque committere. Situm est enim in potestate eius summa maximos atque robustissimos hostium exercitus parua nostra manu fundere atque delere: quod Gedeoni, eiusque exercitui priscis temporibus diuinitus contigisse memoriae proditum est; & Maximiliano Cæsari nostra memoria s̄aþe cōtigisse nos ipsi testes

testes esse possumus. Etsi igitur desperandum non est, si fortè hostis nos militum multitudine vincat, dum modo cetera, quæ ad rem bene gerendam pertinent, non minus desint : quippe cū res militaris magis virtute militum, quàm multitudine niti, & victoria diuinitus concedi potius, quàm humana potentia acquiri videatur : tamen si exercitum iustum, eumque bene armatum contra hostem educere possimus, an non satius fuerit hoc, quàm paucos atque inermes periculo offerre? Deus non ita pendet e nutu nostro, vt quoties rem temere in discrimen adducamus, nos arbitratu nostro iuuare, & inusitata signa potentiae suæ dare cogatur. Qui conantur Deo ita præscribere quodam modo, atque legem dare, certe & fallunt seipso, & in leges ipsius plane committunt. Christus Dominus noster, idemque Filius Dei omnia potuit, tamen cum Sathanas ei suaderet, vt se e superiore templa parte sine incommodo suo præcipitem daret, eaquæ re potentiam suam diuinam declararet, id noluit, cum per gradus descendere posset. Atque hoc sui exemplo monuit nos, ne si fortè facultas eorum, quibus ordine certo & visitato vti possimus, suppetat nobis, eam nos omittamus, & conuertamur ad ea, quæ inusitata ratione eueniunt, & miraculi cuiusdam singularis vim habent. Quò cautiores, prudentioresque esse videntur, qui cauent, ne plus spei quàm oportet, in robore exercitus sui ponant: & tamen cum possint iustum exercitum, eumque bene

bene instructum, exercitatumque habere, ne eum, qui nec numero, nec virtute hostibus par non sit, edificant. Si nullus alius, ego certe spem omnem nostram in Deum conferendam puto; temeritatem tamen probare nec debo, nec possum: hoc præsertim tempore, cum Deus nobis tribuat, ut per Austriacam dominum multū sane possimus. Fecit antehac Imperator noster Carolus sæpe periculum militum, quos e Germania atque Hispania euocauerat; & quantum valeat utriusque gentis coniuncta atque inuita virtus, testimonio Orbis terræ comprobatum est. Neque enim in ullum locum venerunt legiones horū, in quo non singularis cuiusdam virtutis signa dederint: ut spes ostendatur in his etiam posthac, quoad inter se coniunctæ fuerint, magnum præsidium fore rebus Christianis. Sed quid si Italorum, Pannorum, Bohemorum, & Belgarum copiæ accesserint? Deus quando tot, tantasque nationes, easque florentissimas eorum, qui nobis imperant, dicto audientes esse voluit, an non videtur quoddam veluti signum sustulisse nobis ad bene sperandum? An non videtur monere nos, ne, quam potentiam iustam nostra atque omnium Christianorum utilitatis caussa genti Austriacæ adiunxit, eam hisce nostris calamitosissimis temporibus per summam ingratitudinem repudiemus? Hic si, quam Deus ipse offert occasionem præclaram rerum nostrarum constituendarum gratis animis arripuerimus, erit in proclui nobis, ut non solum communium

nium hostium impetus posthac sustinere, sed etiam frangere, & Imperium nostrum sane feliciter propagare possimus. Mathias Pannoniæ Rex etsi non tantum habebat virium, quantum Turcæ, tamen exercitu suo, quem patrum nostrorum memoria in armis habebat perpetuo, & e varijs gentibus coegerat, quoties cum Turcis collatis signis pugnauit, toties vicit, deque eis triumphos glorioſissimos egit. Per se autem, qui equitum peditemq; numero impares quidem sunt, hostibus eisdem, sed fortitudine atque disciplina rei militaris si non maiores, tamen pares, hac nostra ætate maximas horum copias ſæpe deleuerunt. Nos vero qui tam diu Imperium Christianorum ſustentauimus, si cum tot gentibus coniuncti fuerimus tandem, certe nec minus quam vel Mathias Pannoniæ Rex, vel Persæ hostem hunc communem comprimere poterimus; non minus dico? immo multo etiam magis. Cum præfertim illum potentia, hos autem cauſa, cui Deus haud dubie pro misericordia sua fauet, ſuperaturi simus. Quæ cum ita ſint, postulat officium, postulat necessitas non ſolum a nobis, sed etiam a Principibus Austriacis, eorumq; populis ac Regnis, vt inter nos perpetuo foedere simus coniuncti. Nam vt nunc ſunt tempora communis est omnium nostrum cauſa, commune periculum, communes item hostes. Nam qui inuident Principibus illis Augustis, iudem inuident etiam nobis, nec arbitratur ſe utrisque

DE REPUBLICA

nostrūm saluis viuere posse. Et quia animaduertunt, quoad Respub. nostra salua est, se principes hos euertere nequaquam posse : nec vicissim fore, vt Imperiū nostrum intereat, quamdiu ijdem illi tanta cum potentia huic præsunt: sic petunt illorum iugulum , vt nos etiam confodian, & quam nobis afferre conantur perniçiem, eandem illis etiam moliuntur. Quæcum ita sint, videmur cum gente Austrica ita coniuncti esse, vt nec nos corruere queamus sine graui huius damno, nec gens eadem sine magna nostra calamitate concidere possit. Quantum autem præsidij sit eidem, & ipsius populis, regnīsq; in virtute militum nostrorum, hæc tempora plane declarant:cum hi & Pannones, & Belgas quoties opus est defendant. Quibus amissis, quid tandem futurū esset Hispanis? quid Italisi? immo quid Principibus gētis illius? Ac si a gubernaculis Reip. nostræ dimouerentur hoc tēpore ijdē Principes, an non in istis procellis nostris naufragiū facturi essemus nos breui? an non nostris ipsis armis perituri? Omitto hīc periculū grauissimū, quod externi hostes nostri nobis conflare nō desinunt. Quare quod Principū illorū & nostra, omniūmq; gentiū quę in eorumdem potestate sunt dignitas atq; salus publica postulat, vt simus oēs inter nos iuncti, id omnes summo studio expetere atq; curare debemus. Ac primū Principes ipsis, quorum necessitudinem natura ita constituit, vt, si alter alteri non faueat, a seipso desciscere quodā modo, & alienus esse videatur, tāto arctiore societatis vinculo

culo inter se copulentur, quanto minus vnius horum
 damnū ab altero sciunctū esse potest. Habent commu-
 ne nominis decus, communes maiorū imagines, com-
 munia iura & sacra, & horū alij aliorū hereditatem, vt
 proximorum genere iure adire possunt. Quo facilius
 a se impetrari patientur, vt non solūm ipsi inter se con-
 iuncti sint perpetuo, verum etiā vt inter ipsos ac nos,
 immo inter nationes & populos omnes, quibus impe-
 rant, foedus perpetuum fanciatur. Hoc illud ipsum est,
 in cuius curam eo magis incumbere debemus, quo id
 plus commodi cum nobis, tum vniuerso Orbi Chri-
 stiano allaturum esse videtur. In quo si non defueri-
 mus ipsi nobis, certe nec Principes illi nobis deerunt;
 idquē tanto minus, quanto maior spes ostendetur eis
 fore, vt si maximæ illæ, florentissimæqüe gétes nobis-
 cum pulcerrimā tuendi, propagandiqüe Imperij Chri-
 stiani societatē coierint, solidos virtutis suę fructus ca-
 pere, ac sibi æternā gloriam parere facile possint. Quo
 magis cauēdū puto, ne quę datur occasio nobis, in prę-
 sentia Reipub. nostrę ornādę, amplificandęqüe, eā non
 arripiam⁹ atq; cōpleteamur. Magnū est, credite mihi,
 robur, & quasi numen cōsentientis alicuius populi: at
 quāto maius erit tot populorū atq; gentiū cōsentien-
 tiū? Et, vt mihi quidē videtur, cōctui corū, q̄ ita sociati
 sunt inter se, Deus, q̄ caritas ipsa est, pręsto erit in per-
 petuum: sub cuius tutela q̄ latent, an hos vlla hostiū vis
 vincere potest? Quare si tantū tribuimus nobis, tantū
 patriæ, tantū cūctæ Reipub. Christianę, quantū debe-
 M 2 mus,

mus quo quisque nostrum magis gratia , auctoritate,
 atque consilio valet, eo magis elaboret, vt Respub.no-
 stra languens primo quoque tempore recreetur , refi-
 ciatur, & in eum , vnde decidit, statum bonum atque
 beatū restituatur : id quod haud dubie eueniet, si ra-
 tionem huius constituendæ, atque amplificandæ, quæ
 se hoc tempore vltro offert, non repudiauerimus. Vo-
 lo equidem Imperium nostrum florere , id tamen sine
 vlo incommodo aliorum Christianorum populorū,
 immo verò magno cū commodo eorum , qui nobiscū
 fuerint coniuncti; atq; eam censeo esse oportere fœde-
 ris, quod probo, rationem, vt nullus horum pristinam
 suam libertatem amittat, nec in nostram, aut vlliis al-
 terius gentium potestatem concedat. Volo nos omnes
 idem de salute publica sentire, & tanquā vnius corpo-
 ris mēbra, si vnū langueat, omnes dolere: si vnū bene
 habeat, ac rebus secūdis vtatur, omnes gaudere, vt si
 gulorum bonum commune omnium esse videatur.
 Volo regna illa sociorum non minus salua esse, quam
 Respub.nostram . Quin rationem fœderis huius ita
 constitutam cupio , vt quæ regio laborat maxime,
 huic ab omnibus potissimum subueniatur , id quod
 vera æQUITATIS ratio postulabit, atque vt ijs, quos vel
 intestini motus, velexternorum hostiū arma premūt,
 subito possit auxiliū ferri: idquæ cōmuni omniū fœ-
 deratorū sumptu singulæ nationes illorū singulas le-
 giones alant perpetuo , & copias illas iunctas in loco
 oportuno collocent. Accedant ad has Bohemorum

atque

atque Belgarum auxilia, ac si populi hi singuli singulas legiones sustentare nequeant, sustentent tamen tantum, quantum possunt. Solet quidem quod nobis atque Christianis populis imminet discrimen a Turca grauius esse eo, in quod quidam Europæ Reges atq; populi nos sociosque nostros adducere posseunt. Nam vt hi se se commoueant maxime, est tamen spes fore, vt minore negotio depellere eos, aut ita reconciliare nobis possimus; vt cum eundem, quem nos, socijque nostri Christum colant, malint tandem esse nostri amici quam hostes, & nobiscum, atq; cū tot Christianis gentibus fœdere iungi, quam nos atq; easdem laceſſere; id quod sine grauiſſimo periculo suo facere non poterunt. Et quanquam hæc speranda sunt, tamen si qui fortè horum ab armis contra nos, aut socios nostros suscep̄tis discedere noluerint, eam consilij rationem ineundam censeo, vt laborantibus succurratur ab omnibus fœderatis, idq; pro rata cuiusque populi parte. Magnæ enim opes ac late omnino patentes sunt Germanorum nostrorum, Italorum, Hispanorum, Pannorum, Bohemorum, Belgarum; vt quod onus bellorum gerendorum singuli, si ab alijs non adiuuarentur, ægre fortasse ferre posseent, id cunctis futurum sit leue. Et quanquam rebus Christianis in virtute, robore, & multitudine militum nostrorum multum est præsidij, tamen si copiæ gentium illarum accesserint, quanto facilius non solum in Europa, sed etiam in Asia hostes com-

munes comprimere poterunt? Muniatur sane Pannonia præsidio maiore , eò quòd maior atque potentior hostis ei bellum inferre solet : ac quoties hic maiores copijs in Regnum illud , aut vicinas gentes impetum facturus esse videtur, constituatur, vt communis omnium fœderatorum ope, atq; sumptu idem præsidium augeatur atque firmetur, nec interea alijs auxilium iustum subtrahatur, quotiescunque eodem eguerint: vt foedus ipsum tanto sit stabilius , quanto eius, quod per se æquum est , maior ratio habita fuerit . Hoc loco, ne vobis ista prudentia viris præscribere videar, præteribo , quæ præterea sub deliberationem cadunt: nec dicā, quod me etiam tacete cogitabitis ; atque curabitis, vt si quæ aliquibus fœderatorum ab hostibus crepta fuerint,his eisdem restituantur: sin quæ præterea capta fuerint, hæc nostro Imperio,ad quod iure pertinent,adiungantur. Quod cum per se iustum fuerit, tum vero etiam æquum , vt cum Imperium Romanum penes nos sit , & res Christianorum militaris nostro potissimum milite nitatur, res nostræ tanto magis crescere debeant , quanto plus præsidij atque utilitatis rebus communibus afferre & possunt & solent . Et quia hic tribuetur cuique genti , quod suum est, non erit profecto , cur quemquam huius nostræ iustissimæ, utilissimæ , atq; honestissimæ societatis pæniteat. Nos autem,nos inquit Germanos eo minus huius pænitentebit, quo magis & potestate,&dignitate Princeps noster cumulabitur;

vt quos antehac hostes ægre a capitibus nostris depulit, eos posthac, si opus fuerit, aut sedibus ipsorum pellere, aut intra fines eorundem comprimere summa cum gloria nostra valeat. Ac si rationibus nostris ita consuluerimus, & ad officium atque bonum publicum reuocauerimus omnia, certe Deus, qui bonis bonorum consilijs atque conatibus mirabiliter fauet, procul dubio ita nos adiuuabit, vt Respub. nostra atque totus Orbis Christianus breui refloescant. Habetis hīc Principes populi que Germani, quæ de omnibus commodis ornamentiisque vestris dicenda putaui; & vos rogo, obsecro, & per sanguinem seruatoris nostri Iesu Christi obtestor, vt si hæc videbuntur bona esse, si vtilia, si honesta, si pia, si Reipub. nostræ necessaria, ea tantum apud vos valere patiamini, quantum patriæ nostræ communis atque adeo totius Reipublicæ Christianæ dignitas, & publica salus a vobis impetrare debent. Testor Deum immortalem, qui solus abditos animorum nostrorum sensus perspicit, me consilium hoc nō aliò quam ad communem utilitatem atque dignitatem vestram referre, nec aliud petere, quam quod patria ipsa iure quodam suo a vobis flagitare videtur. Quæ si una voce loqui posset, haud dubie in hanc sententiam ageret vobiscum. Ego si a vobis hoc postularem, vt mea caussa de suo quisque vestrum priuato iure decederet, vel mortem non dubiam adiret, an non hoc iure quodam modo facere viderer? Ita enim genui

DE REPUBLICA

vos, vt si opus sit, vitam ipsi nostram pro me profundere debeatis. Sed quia tamen consilium, quod datur in præsentia vobis, non solum duriora illa excludit, verum cauet etiam, ne bona fortuna squalue vestras amittatis, neue in ullius periculi flammam vos temere coniiciatis, tanto minus id repudiare debetis, quanto idem cum commodis vestris atque rationibus siue priuatis, siue publicis est coniunctius. Ac primum quia a vobis hoc petitur, vt sublatis similitudinibus sitis concordes inter vos, & idem de Repub. de religione Dei immortalis, deque publica salute sentiatis, an non hoc illud ipsum est, ad quod si taccerent alij, vos tamen ipsos excitare deberetis? Qui nisi desieritis oppugnare vosipso, & me lacerare, non modo non Germani eritis inter vos, nec ciues mei amplius, sed inimici, planeque hostes. Nam quatenus intestina inter vos bella geritis, mihi tanquam matri vestrae manus affertis; immo vosipso, a quibus nullum meum malum sciunctum esse potest, laeditis atque affligitis. Hoc loco si vobiscum expostulare vellem, possem id quidem iure quodam meo; sed quia libenter de eodem iure meo remitto, vt vobis parcam, vos hic moneo tantum atque hortor, vt animos dignos Germanis hominibus suscipiatis, & in Repub. mea constituenda tantum tribuat mihi, quantum salus vestra atque publica postulat. Deponite igitur similitates, si quas inter vos geritis, & in me atque Rempub. meam totis pectoribus, & singulari animo-

rum confessione incumbite. Quod ipsum & necef-
sarium erit vobis, vt perniciem certam vitetis; & ta-
le prorsus, vt mihi atque vobis vberrimos fructus
afferre queatis. Quippe cum hoc tempore tantum
possitis, vt qua parte collapsum non refici solùm,
sed ita etiam ornari possim, vt tandem non minus,
non minus dico? immo etiam magis floream, quam
Caroli illius magni atque Othonum tempore felicis-
simo florui. Habetis Principes, Augustos tales, vt
meliores ne optare quidem possitis, qui & volunt, &
possunt me iuuare; nec solùm tueri dignitatem,
quam habeo ego, & vos in me, sed etiam augere at-
que amplificare, si modò ipsi volueritis, & a comple-
xu ipsorum vos ipsos vestra culpa non diuulseritis.
Quare si me, me inquam, matrem, quæ vos genui au-
ditis, habetote rationem meæ atque adeo vestræ sa-
lutis; & cauete, ne quæ hoc tempore oportunitas da-
tur rerum vestrarum & constituendarum, & ornan-
darum, eam amittatis. In quo ipso si ita gesseritis
vos, vt officium vestrum desiderare videtur, de me
profecto, de vobis ipsis, deque vniuerso Christiano
Orbe optime merebimini. Hæc si Germania loque-
retur vobiscum atque ageret, Principes populique
Germani, an vocem eius aspernaturi essetis? Nihil
arrogo mihi, sed tamen si quod suadeo ipse, & pa-
tria nostra communis flagitare videtur, impetra-
uero, non erit profecto, cur vos sententiæ meæ atq;

L. 6. 7.
DE REPUBLICA

consilij pæniteat; & ex officio vestro eos sanc fructus
percipietis, qui vobis atque Germaniæ nostræ cunctæ
maximas vtilitates ac summa ornamēta allaturi sunt.
Quod vt eueniat tandem, pro ea, qua patriam hanc
nostram complector, caritate optare ego maxime,
& supplices ad Deum manus tendere, fidem-
que eius, ac nomen sanctissimum im-
plorare non desino.



ANTVERPIÆ,

Excudebat Guliel. Silvius Regius Typographus XII. Ka-
lend. Septemb. M. D. LXII.